


柯山集附拾遺

六



集 山 柯  
遺 拾 附  
(六)

撰 李 張

# 柯山集卷四十七

啟

答林學士啟

伏審光膺宸綺。進直蘭臺。榮命始行。儒林增重。竊惟館閣之選。蓋待儒學之臣。既非典領之權。幾于冗散。又無議論之責。少補絲毫。宜非仕者之願居。而爲一世之所尚。蓋學問爲君子之事。職卑而待之不輕。詩書非俗士所知。祿薄而意則甚厚。雖厭居寂寞。夸者至謂之病坊。而脫略等夷。赤尉均稱于宰相。名旣如此。人猶貴之。而况將相之選。踵武相尋。祖宗以來。掄擇爲重。故本朝之寵儒者。雖他官必假此名。伏惟某官文麗而用長。才周而學富。父子濟美。兄弟有聲。行實著于家庭。經濟冠于朝右。冠豸彈擊。風霜凜然。攬轡按行。疑竇立解。已登進于卿棘。復入直于道山。豈專是正之功。實示超騰之漸。某淮楚晚進。場屋後來。辱登門牆。嘗備官屬。當趨風于末坐。乃首贊于長牋。爲禮則勤。循分而懼。孔鸞同列。忘魯鈍之卑。飛珠玉藏家。驚輝光于貧屋。永爲好也。何日忘之。

代人謝及第啟

困瑕疵于指玉。獻已過三。收奔敗以誓師。戰猶借一。僅能無辱。豈足言勞。伏念某受才樗疎。趨世迂闊。拙

無他技。幼刻意于藝文。家有遺風。世知名于科級。童子習雕蟲之技。已屢試于鄉邦。專門尙經術之科。曾再遊于禮部。一行作吏。終日坐曹。几硯已積于埃塵。詩書錯陳于朱墨。人耳人耳。頗羞請鑄之金。時哉時哉。思樂無求之雉。屬大明之繼統。仰衆正之來同。恥窮有道之邦。願列思皇之士。隨衆碌碌。僅乃有成。半世遑遑。所得如此。惟其無似。已合知榮。茲蓋伏遇某官。左右太平。設張治具。收才能于無間。本選舉于至公。刈楚旁及于艾蕭。濬川下通于溝澗。羞愧平津之策。絕意上游。庶幾毛遂之奇。收功下客。

潤州謝執政啟

比者伏奉告命。除直龍圖閣知潤州軍事。已于閏四月二十九日到任交割訖。伏以文章爲學者餘事故。先王不以經世富貴非人力所制。故君子以爲在天。而况修詞塞淺。未涉作者之流。趨世闊迂。每在衆人之後。則其投閒置散。寔後跋前。在所當然。夫復何恨。伏念某羈旅一介。憔悴餘生。困篋楚者十年。這飢寒於斗祿。仕已成于漫浪。意何有于功名。始誤實于成均。復進升于儒館。佐東觀之論著。頗見舊聞。紀先帝之事功。遂遊藏室。擢升右史。密侍清光。雖學儒之至榮。豈草茅之素望。而疾病侵耗。心力衰疲。分敢自安。義當引去。駕馬自竭。驛歷塊而已。超神山在前。風引舟而忽遠。尚叨便郡。獲養殘軀。靜循此恩。蓋有所自。茲蓋伏遇某官。曲成萬類器使。庶工直鏤蒙鑠。疾者未嘗逮廢。大宋小桷。施之各以其宜。致此枵虛。未卽捐棄。獄訟希簡。職事不廢。乎詩書山林幽深。形骸頗爲之清快。庶餘齡之可養。幸沈痼之有瘳。仰報至恩。將必有在。

賀錢內翰啟

伏承內翰侍讀四丈罷直內閣升華禁林解天府之浩繁侍經帷之清燕雖衆望所屬理固當然而成命既行士以相賀伏以學士號爲職親地要實儒者之至榮訓辭欲其言近指深必文人爲充選設官雖專于書詔儲才常用于鈞衡被選益艱因人增重雖從容入侍獨高大白樂天之詞華而論議經邦復重德裕敬輿之術業苟擅一長于此皆爲稱職之才洪惟本朝繼有碩望方當聖主之圖任果見異人之來儀伏惟某官學總百家才高一世經守韋平之學世登晁董之科無施不長所治皆最批竇蹈竊在庖丁如無牛越國過都于騏驥爲歷塊隱然公輔之望久矣中外所期俄聞異恩大懋衆論謀謨黼座何慙天子私人顧瞻玉堂應歎吾家舊物卽膺大拜用究遠圖某每愧庸虛素承知獎其爲欣快實倍等倫嘆白髮之侵陵望青雲于寥廓歲事已晏德履多祥更冀保頤下副祝願

宣州謝兩府啟

比者法當易地恩使造庭方奔命于半途遽分符于使郡地未殊于南北舟楫相通憂方切于困窮廩祿有繼雖徼幸出聖朝之厚而曲成皆高位之仁已見吏民粗知風俗茲蓋伏遇某官受天間氣爲國元臣道德致君議論垂世器衆材而無棄慮一物之遐遺遂令罔功每輒得所退觀所領自昔有聲道德在人有顏真卿之政事登高舊賦稱謝元暉之文章某素乏詞華不通吏道一無稱可全有便安民消愁歎之聲自緣聖治家受飽煖之福徒費君恩尺寸無施冒昧而已歲事云宴幾政多閒伏乞俯爲華夷精調寢

味。

賀錢都尉啟

伏承光膺綸綺雄領節旌遠俗知榮侯藩增重其爲僚屬益倍歡愉伏以懿親建邦粵古令典惟盛朝尙王姬之貴在一時皆妙選之才旣內奉朝請而爲國華亦外假風聲而持將鉞屈天姻之華貴尉南服之荒遐民社有光江山增氣恭惟某官朝推令德世有美名夙以才猷膺茲選擢忠孝著甲昔受大賚之王封簪笏滿門今爲五世之卿族聞望卓爾寵祿從之雖仰青雲之絕塵亦受靈河之餘潤優游美望素欽武子之才豪留務不煩久服征南之恩信歲事已宴賢履有休更冀保調以綏戢穀

謝鮑承務啟

伏審光臨民社寅布教條德庇所臨愚陋知免竊惟漢唐之盛惟以守令爲難或由郎而出宰邱民或歷縣而入官華省謂將責之經世莫若試之臨人恭惟聖朝亦重茲選凡膺民社之寄莫非慈惠之師伏惟某官炳蔚多文淵源博學行已信于鄉里名久播于搢紳素懷製錦之良能方展割雞之利用略據素業均惠遠民牒訴雖繁敦本可使無訟解寡未久有政爲善養人雖君子之微猷蓋高才之餘事况復江山清遠民物阜安獄訟多餘樽俎可樂莫陪談笑徒竊傾馳過此以還未知所措

賀廣德知軍啟

伏以星回于天旣發春而獻歲帝出乎震方去故而就新天時于是更端賢者受其介福伏惟某官風猷

強敏道義深純度越衆人獨立一世烏臺彈擊數千鈞之弩而發機山郡刺裁持屠牛之刀而破蠭惟其道用煥然日新俯同世人仰受天福

謝建平知縣啟

茲者過沐殊私特貽盛禮一日之長託末契之光華通家之歡傷前人之零落俛跪之際感喜交并伏惟某官文學承家吏能絕俗一見許論于家世並遊遂列于弟兄昔日桑弧交慶兩家之生子相逢樽酒共驚五十之幾年敢不傳義好子子孫謹銘藏于肺腑過此以往未知所裁

賀太平知州啟

伏承輶講經帷剖符江國餘光所芘弱植知安伏惟某官奧學造微高行絕衆赫奕家世照臨遠方清淨道心消鎮浮俗遙想公餘之多暇未妨禪觀之無爲出入起居輕利安穩某夙懷問道幸託爲鄰惟仁人志常在民自今日請學爲政雖相聞雞犬實一葦可航之川而坐困簡書有其人甚遠之歎顧茲傾素曷罄敷陳

上黃州郡守楊懷寶啟

某愚暗觸禁憮不自知仁聖至明罰惟當罪雖從黜責尙得依歸平生京洛之遊交情有素千里江山之別老境已侵豈知投竄之餘忽有笑談之便淋漓醉舞坐沉痼而少衰慷慨悲歌撫壯心而猶在靜言思咎亦旣戒行忽忘跋履之勤喜遂瞻依之素伏惟某官天資拔俗國器冠時利刃吹毛長劍耿介倚天外

高標絕衆野鶴昂藏在雞羣擅風流獨步之名有雍容甚都之觀左挽繁弱邁越石之奇一割牛心兼武子之逸蓋嘗奉使諸部固已著迹本朝賦吳郡之溪山醉金陵之風月遺愛猶在陳迹可尋屈臨方州實幸遠俗某去國流浪多病變衰流水高山知者益寡附輿執轡今也則亡雖無聊遠竄之可憐得相逢一笑而何恨私用自賀夫復何言春序正暄更祈保衛

賀潘奉議致仕啟

伏審親家致政奉議上還印綬退卽里閭已私知止之安將受永年之福凡居親舊實助忻愉竊以人之多難在于儒者尤甚壯年講學謂富貴利祿之可期小試多違信功名遇合之有命加以歲月荏苒時不待人顧瞻簪裳義則當止彼貪冒無恥者率皆優佚而老惟進退顧義者不免飢寒之憂未餘漢庭之賜金復休故社之喬木追計宦遊之廩祿何有一毫復與平生之簞瓢相從三徑莫非命也謂之何哉伏惟某官與學淵源懿行金玉久栖遲于末路遂高退于明時清譽益隆多祥有在某自憐罪戾久困泥塗延企高風但懷景仰

答楊州司法謝薦啟

式懋才猷顯膺褒薦過敦謙德躬贊高文兢懼靡遑珍藏爲好竊以長史薦士蓋遵著令之文小官求知將應有司之格然在下者常難于際可居上者亦歎于才難苟蒙特達之知亦謂非常之會伏惟某官溫恭飭己道德承家老成之典刑具存正始之風流猶在青衫手版共歎棘棲之鸞命衰貂冠茲爲鴻漸之

翼既深感愧又切頌祈

## 疏

### 三天洞求雨疏

伏以宣城之境春末以來雨施不時稻未得種父子熟視而無告官吏不知其所爲凡曰有神靡不致禱豈德薄莫能感格抑民災未易祓除莽大澤與高原赫炎風兮畏日恭惟禪師具千乘眼得一佛乘無有親疎等加悲憫護衆生如赤子觀此世如掌中則夫鬱興大雲普降甘雨宜翹足可待實伸臂之勞其在神通蓋甚容易眷茲千里之澤請以三日爲期時或有愆事且無及

### 三天洞謝雨疏

維清淨心雖于三界無所著以慈悲故常憫一切諸有情頃以旱災輒伸誠禱卽時感達應念雨來變饑僅爲豐穰易煩惱爲歡喜顧茲恩施曷有報償哀民生之多艱顧真乘之卒相俾無失望是謂大慈



# 柯山集卷四十八

祝文

祭社文

某受命于朝來守此土宣上之德以保有民社惟神之功百世通祀幸得以時躬薦牲幣徼福于民莅事之始敢敬致告惟神鑒之

祭稷文

惟神之功立我烝民有邰之君實興周室萬世通祀光配無極某受命天子來長斯民歲時奉祭祀幣有秩莅事之始敢告有常神其鑒之永錫斯土

祭文宣王文

惟吾聖師生于此又嘗仕于此蓋自衛而刪詩定樂既沒而葬皆在此也教之在魯深矣某受朝命來守此土意遺風逸禮必有在民願與諸生究觀而講明之莅事之始敢不致告非以爲禮庶用致虔

敬亭廣惠王求雨文四首

嗟乎吾民其困久矣去歲積雨大江橫流兩圩旣墮一境受弊補復亡散實在今年死生存亡間不容髮

而自春及夏時澤未滋。芃芃四郊稻且不植。吏術莫救。必神之求。神食斯民。忍視其疾。惟王威靈功德。烜赫在民。指揮蛟龍。震作雲雨。一瞬之力。豈或難之。

山川之神。能出雲氣。見變怪。以司雨暘之權。以佐民衣食之用。則是有職于民者。故朝廷隆以爵號。表以廟貌。有司歲時奉祀不絕。自四月至今。以旱禱于王者。于是三矣。今事已益急。雖瀆神有罪。而不敢避也。惟王俯而聽之。油然而雲沛然而澤。以除民之病。以紓吏之責。于王之神。警歎之力。有職于民。宜不愛惜也。

宣之爲州。被山帶江。民耕于高。無灌溉之利。而仰澤于天。故閱月不雨。則以旱告。今茲季夏之初。時雨大至。諸山之田。旣植且茂。比日乏雨。積水且竭。亦嘗雨矣。然方作而止。又不偏也。是以民心惶惶。憂在歲事。吏無以爲術。但知有謁于神而已。夫困廩之有。將入手而取之。稊稗之食。將下咽而奪之矣。抑又神之所不忍也。

南方之民。以稻爲命。而稻非水不植。神所知也。今茲四月且盡。而原田槁乾。待水種稻。而雨不降。澗溪之流。亦復淺涸。民情惶惶。如失火之待水。寒疾之待汗也矣。今不種。則一歲且無食。其飢餓死亡。流轉于溝壑。可立而待。則其憂懼危迫之情。蓋可知矣。乃茲月甲申。嘗率僚屬有禱于神。神如答之。翌日而雨。然施澤未渥。雲日已霽。豈神未念民之病。姑以塞其意而已耶。審如是。其繼有請。雖十百其未止也。神雖欲罪其瀆而降之罰。亦末如之何矣。今事已甚迫。敢盡布之。惟立興風雨。一雨三尺。其于農事。乃克有濟。某亦

有不腆之牲酒。以報神之德。惟王速圖之。

廣惠王祈晴文

請雨未幾。又復謁晴。在人宜怒。况神之靈。沃野茫茫。歲將有秋。誰爲之孽。雨淫不收。失望垂成。吁嗟憫憂。不敢避瀆。冒昧有求。神或哀之。疾尙可瘳。

靈濟王求雨文三首

惟王昔以功德受國爵命。衰服南面抗儀王者。可謂盛矣。數州之民奔走奉祀。以時不懈。積有年矣。受國爵命。則如有位于朝食民奉祀。則如受祿于國。然則其可不察民之利病。與之同憂樂哉。今民之大憂。王亦知之矣。乃自春末至今。時雨不降。仲夏而稻不得種。一方之民。拱手而待饑饉。甚可哀也。而王之威靈光烈。烜赫甚著。其于蛟龍以致雲雨。且無所難。夫爲所不難。以解民之大憂。以是致禱。當在所答。今旱已甚。非沛然大雨。則于農事猶無所補也。若夫苟施微澤。姑以塞其意。而曰吾嘗雨矣。則非某之所敢知也。

水旱有數。尙憂堯湯。聖無如何。矧此一方。人治其陽。數之所拘。神造數者。可得卷舒。戊戌有請。逮今未至。神之威靈。胡難其易。旱野童童。塵生溝澗。神其鑒之。賜以滂沛。

自夏徂秋。謁雨于王者數矣。豈惟厭之而不答。將怒其瀆而降之罰也。某則謂之不然。求者以不隱爲情。施者以不倦爲仁。譬之君親。求則謁之。何瀆之嫌。爲之君親者。視其所求可則與之。何倦于數用。是輒有

請于王而不疑。惟王威德烜赫。臨此一方。吏民奉事。歲時不懈。則其有請。尤在所答也。

靈濟王祈晴文

徹救旱之奠。曾未逾旬。陳止雨之辭。則已在廟。不修人事。惟神之求。罔忌威靈。其瀆已甚。罪不能脫。誠或可通。今茲多稼。既成敗于將穫。積水且溢。決則不支。始幸倉廩之將盈。俄憂父子之不保。盛德未竟。大恩宜終。夫呼而爲風雲。吸而爲開霽。于神無費。庶禱必從。

景德寺祈晴文

伏以雨旣時若。歲將大熟。而陰霖不止。水潦將增。大懼隄防之圮墮。偃瀨之蟄溺。欲除民病。惟賴佛乘。伏望消伏陰魔。開通慧日。拔幽沉爲明達。變苦惱爲歡謠。衆生之疾旣除。能仁之願亦滿。

祭天齊仁聖帝並城隍祈雨文

比以旱故。禱于一二神。幸時雨之沛。施免斯民于饑饉。而誠薄未格。報至不時。豈媚于神者有未至耶。抑在茲境者或不舉也。今旱旣甚矣。民亦殆哉。莫知所爲。惟有致禱。謹遣僚屬。徧詣祠宮。於赫有神。時賜甘沛。惟民與吏。皆獲卽安。牲酒馨香。將以爲報。

廣惠王謝雨文二首

禱旱壬寅。雨旣隨至。匪亟匪徐。澤此厚地。旱野千里。稻如雲浮。農人笑歌。以樂易憂。哀此困窮。神德之厚。躬羞菲薄。吏則何有。我聞仁者。施不責償。鑒其誠悃。臨此一觴。

一歲薦禱我顏則羞神乃哀之輒與所求問我農夫我田旣減無有高卑均爲豐穰父子相保饑寡有依守臣何功神則與之牲酒瘠酸報微施豐惟誠與潔庶以薦衷

### 靈濟王謝雨文二首

問者有禱實以亢陽神答其誠翌日沛滂風駕雲旗飛澤淋浪應龍翔嬉妖魃奔忙靄靄田原萬畦齊秧父老相慶豐年有祥牲酒微薄愧升廟堂抑神之仁豈責報償頃以旱故遣吏致祈其慢宜罰神顧聽之獵獵風雲來自東南協氣橫流妖魃奔潛溝澗畢通高卑具沾活此一方老稚舞歌守臣冒功幸此時和牲酒不腆匪以報德光揚威靈傳示無極

### 祭魯恭王文

惟王託體聖父奄宅龜蒙龍旂旄鉞天子之容文物焜煌照臨東國一有八年榮寵之極臨終上書以禮自克千載讀書猶懷感惻茲惟舊封爰有廟食荒榛喬木薦享寂寂時有農父來祈黍稷坎坎擊鼓刲豚布席雨暘疾癘求無不獲愛人之心千古不息某具舟楫將寄穎尾漂泊五年未知攸止吾道非耶乃底于足悠悠天道惑之久矣再拜祠下神鑒其志行旅之薦不及酒哉

### 祭聖帝文

貶逐積年窮無所憇而聖上哀其不辜復畀之民社而來守此邦也則亦惟是旱乾水溢之不時將有請于帝帝之仁民宜無或難莅事之始敢以告姑以致虔禮則已略惟帝鑒之

## 祭文

祭成都李龍圖文

嗚呼公擇其中退然如不勝衣而能爲人所不能爲在熙寧初政有大議柄臣持之一壓以勢公奮力爭與相抵刺厥聲凜然卒墮于外流落十年天子思之歸卿太常君子之喜於穆聖后緝熙于學公侍講讀以開以覺正位地官幹邦盈虛持國風憲匪激匪紓嗚呼公擇孝友烝烝祿富族親妻孥無贏死不能喪圖書在簾施于朋友孔燕豈弟曠無累心清有遺味公去朝廷大旆高牙孰云來歸哭引喪車旦夜死生不足歎嗟善人存亡實繫邦家叙哀一觴其飲之耶

### 代范樞密祭司馬溫公文

嗚呼天祚有邦畀之元龜篤生我公爲世父師夷齊之清淵騫之德子產之惠叔向之直人擅其一足以成名公兼衆德乾乾不寧九流百家金匱石室鈎索沈隱裁其失得根柢治亂經綸皇極作爲文章有書秩秩元圭大裘望之肅然冬陽夏冰赴者爭先仁英兩朝鍾鐘厥聲國有正人折姦于萌桂染者木求直于繩我公盡規君心則寧烈烈神考體貌有德公獻其可巖巖翼翼言有未用不敢受爵深衣幅巾歸休于洛公則休矣四方顒顒君子野人洎于他邦聞者懷歸于父于兄天施不齊或怨寒暑公獨何施四海一譽元豐末年國有大事穆穆文母宥我神嗣爰立作相媚于神人我公在廷其重萬鈞士賀于朝民歌

于塵農慶于野兵休于邊燠爾慄寒養其飢孱無瘠于饑無禾于田培其本根枝葉則茂豈曰我作憲章  
惟舊於赫聖考左右上帝休公于家實遺聖子卷耳思賢夙夜周京不惑不疑成此太平公之去來人之  
戚嬉人之戚嬉帝之從違豈人事耶天實爲之純仁不才辱公知深人之相知貴相知心惟公我知洞達  
表裏采其所長謂或可使申結義好邱山不移匪我則然公實取之泚泚清洛獨樂之園嘉華春敷修竹  
夏寒海酌翛然我招我從琅琅喜言有銘在躬朝偶乏人備位樞機入與國論獲親風規六七年間爲益  
不貲私祈白首從公以歸憂勞傷生公旣遘疾庶幾有瘳卒相王室國祠旣誓公以喪聞我心之悲不獲  
至門入哭于室公旣大歟終天之情不一見面人生有死如旦夜耳曾子將沒知免而喜公身旣修公志  
旣畢旣壽令終無有其失有如公者古今萬一任重道遠稅駕茲日庶幾念此以紓我悲猶有鬼神實聞  
我詞

祭劉貢父文

嗚呼子之強學博敏超絕一世肇自載籍孔墨百代太史所錄俚閭野記延及荒外陰陽鬼神細大萬殊  
一載以身下至律令老吏所疑故事舊章在廷不知有問于子歸如得師直貫旁穿水決矢飛一時書林  
衆俊並馳滿堂賢豪視子塵揮逸足奇毛不受縛羈擯守列郡吏民畏思治盜句冤不事誅斬他嚴見欺  
子愛不犯中斥于南人憂子怡歸來白首晚職訓詞子之來歸亦旣疾病惟其精明猶足以永誰云如子  
竟止斯耶國失君子善人之嗟方其盛時弛不得張亦旣有遭而蠱其強誰與子仇敗子百方雖然今日

竟何有亡。惟我與君同年進士，申以婚媾，兼恩與義。平生談笑，樽席燕喜，其當鑒耶？臨此酒哉。

祭夏侍禁文

惟靈胄出豪貴，服膺禮義恪守官次。志于詩書，云何不淑。奄至大故，命有脩短。夫復何言。日吉時良，安以卽路。奠觴爲決，已矣嗚呼！尙饗。

祭蘇端明郡君文

嗚呼！人生萬殊，之死同科。其間疾徐，相去唯阿。作嬪大賢，克宜厥家。婦也有茲，萬一則多。顯允夫人，簡儉純明。相其君子，險夷屢更。穆穆愉愉，何易何艱。能俾君子，卽居而安。象服委蛇，亦旣輝光。云何不淑，乃折于強。蘇公執喪，盡禮致哀。曰予德思，匪媾之懷。某等受學師門，義等族戚。矢詞殯前，侑此酒食。

祭李深之文

嗚呼！昔我先人，剛介峭峙。行于天下，得友無幾。遇公兄弟，則無間言。惟屯田君，則實同年。公時常多病，癯然江淮之間，相與周旋。未之兄弟，應舉姑蘇。朝夕誦習，託公學廬。公晚得官，拜公宛邱。後二十年，遇公瓜洲，相從武昌。亦旣謝仕，杖履逍遙。旁有令子，何圖末疾，百治不完。歿不得歸，卽立于焚幽宮之刻。委于不肖，文不稱事。矧能有耀，身在罪籍。動有縛維，無窮之別。不獲往辭，寓誠薄奠，尙酌一卮。

祭秦少游文

嗚呼！少游淮海之英，自其少時，文章有聲，脫略等輩。論交老成，衆譽歸之。誰敢改評？聿來秘書，亦旣飛鳴。

脫身亟去事變隨生嗚呼官不過正字年不登上壽間關憂患橫得罵詬竄身瘴海卒仆荒陋君孤奉喪歸葬廣陵拜我于黃尚有典刑會葬撫孤我窮不能具此菲薄聊致我誠隻雞斗酒懷想平昔嗟我少游尚肯來食

祭晁无咎文

惟我與公交遊之義外雖朋遊情實兄弟公生癸巳我長一歲平生宦學何一非是念初相遇盱眙逆旅一見如舊綢繆笑語契闊積年俱職太學並試玉堂同升館閣讀書飲酒兩各壯年意氣豪盛自以無前公之文章瑰琦卓犖割裂錦繡揮磨矛槊石渠天祿典籍之委過目輒誦不復再視我守丹陽公鎮于齊行世之艱坎壈自茲建中之初同官于都相對歎息蒼鬢班鬚我出汝陰公守于蒲我負重譴責居江湖知公金山藝圃葺廬最後聞公乘太守車往刺于淮慶未及書嗚呼哀哉九月庚寅聞訃于陳驚呼號天煩冤靡伸年且六十非天之恨所甚痛者殲此善人公素強健無戾于身何恙之速一仆不振嗚呼哀哉平生膠漆永隔亡存弔不撫棺窆不哭墳事也多違不敢愛勤聊陳菲薄侑此一樽尚想平生見我歡忻至悲薰心言不能文



# 柯山集卷四十九

## 墓誌銘

龐安常墓誌銘

吾嘗謂醫之在天下其資民生之用蓋與穀帛等竊怪世之工其道者何少也自三代以來至今以醫名世者多矣其爲論說方術大備矣又嘗怪夫世之醫者皆忽而不學大抵從里閭俗師其治病苟不殺人衆已指爲良醫矣使孝子慈孫不能無恨于疾苦之際者以此也可不悲哉予少多病世之醫往往與之遊率按前人成說而用之未有心得而能原其所以說者也蓋醫之爲道推本天地陰陽經紀寒暑日星考驗國土山川而人身外則骨節脈絡腧穴內則臟腑焦鬲井谷其出入會通之變甚多且微非夫致至精之察不惑之知不足以盡之而世醫不以術易衣食者鮮矣何暇及此哉宜工之者寡而古學之廢也意必有聰明微妙之君子憫茲學之不振悼生人之疾癘獨治其道修其術而莫或知之者焉紹聖丁丑予得罪謫官齊安而得蘄水龐君焉其于醫殆所謂聰明微妙者也君諱安時字安常蘄州蘄水人其在孕時頗有異乃兒時讀書雋穎絕人一經目輒終身不忘鄉黨奇之其父諱之慶號高醫年老且病君問醫于父父授以脈訣君曰是不足爲也獨取黃帝扁鵲之脈書治之未久已能通其說時出新意辯詰不

可屈父大驚君時未冠也已而病聾君曰天使我隱于醫歟乃益讀靈樞太素甲乙諸秘書凡經傳百家之涉其道者靡不貫通時時爲人治病有奇功率十愈八九而君性愷悌明豁好施而廉于是有輿疾自千里踵門求治者君爲闢第舍居之親視餽粥藥物旣愈而後遣之如是常數十百人不絕也其不可爲者必實告之亦不復爲治活人無數病家持金帛來謝不盡取也戊寅之春予見君于蘄水山中深衣幅巾延客坐堂上視其貌偉然聽其議博而不繁妙而易曉告予曰世所謂醫書予皆見之惟扁鵲之言深矣蓋所謂難經者也扁鵲寓術于其書而言之不詳意者使後人自求之歟予之術蓋出于此以之視淺深決死生若合符節且察脈之要莫急于人迎寸口是二脉陰陽相應如兩引繩陰陽均則繩之大小等凡平人之脈人迎大于春夏寸口大于秋冬何謂人迎喉旁取之內經所謂別于陽者也越人不盡取諸穴之脈但取手太陰之行度魚際後一寸九分以配陰陽之數而得關格之脈然不先求喉手引繩之義則脈尺寸陰陽關格之所起寸四倍于尺則上魚際而爲溢故言溢者寸倍尺極矣溢之脉一名外關一名內格一名陰乘之脉曰外關者自關以上外脈也陰拒陽而出故曰外格陰生于寸動于尺今自關以上溢于魚際而關以後伏行是爲陰壯乘陽而陽竭陽竭則死脈有是者死矣此所謂寸四倍于人迎爲關陰之脈者也關以後脈當取一寸而沈過者謂尺中倍于寸口至三倍則八寸而爲覆故言覆者尺倍寸極矣覆之脈一名曰內關一名曰外格一名曰陽乘之脉曰內關者自關以下內脈也外格者陽拒陰而內入也陽生于尺動于寸今自關以下覆入赤澤而關以前脈伏行則爲陽亢乘陰而陰竭陰竭亦死

脈有是者死矣。此所謂人迎四倍于寸口爲格陽之脈者也。經曰：人迎與寸口皆盛過四倍則爲關格。關格之脈羸不能極天地之精氣而死。所謂關格者，覆溢是也。雖然，獨覆獨溢則補瀉以生之。尺部一盛瀉足少陽，補足厥陰。二盛瀉足太陰，補足少陰。三盛瀉足陽明，補足太陰，皆一瀉而一補之。四盛，則三陽極導之以針，當盡取少陽太陰陽明之穴。脈靜者取三陽于足，脈數者取于手。瀉陽二當補于陰，一至寸而反之。脈有九候者，寓浮中沉于寸關尺也。且越人不取十二經諸穴，直以二經配合于手太陰行度。自尺至寸，一寸九分之位，復分三部。部中有浮中沉，以配天地人也。又曰：中風木傷寒，金濕水熱火溫，病起于濕濕，則土病。土病而諸臟受害，其本年于金木水火四臟之變也。陽浮陰濡爲風溫，陽數陰實爲溫毒。陽濡陰急爲濕溫，陰陽俱盛爲溫瘡。其治之也，風溫取足厥陰木手少陰火，溫毒專取少陽火。傷寒取足太陰金手少陰火，溫濕取足少陰水。鄉人皆謂我能與傷寒語，我察傷寒與四溫之變，辨其疑似而不可亂也。故定陰陽于喉手，配覆溢于尺寸，寓九候于浮溢，分四溫于傷寒。此皆扁鵲略開其端，而予參以內經諸書考究而得其說，審而用之，順而治之，病不得逃焉。君爲予言者尙多，獨著其大者。又曰：予欲以其術告後世，故著難經解數萬言，觀草木之性，與五臟之宜，秩其職位，官其寒熱，班其奇偶，以療百疾，著主對集一卷。古今異宜，方術脫遺，備傷寒之變，補仲景傷寒論藥有後出，古所未知，今不能辨，嘗試有功，不可遺也。作本草補遺一卷，吁其備矣。予問以華佗之事，君曰：術若是非人所能爲也。其史之妄乎？某嘗病風痀，數年餘，苦未盡瘳。君切脈曰：臟病傳所勝。君之疾，肝傳于脾，脾氣欲轉運而肝制之也。去木邪，行土氣。

而後愈。因授予以方少焉。疾有間。又曰。一方不可瘳。當增損之以應疾。時時致方與藥之難得者。察君子予盡心焉。見君之歲是冬。而君痼疾作。明年春而劇。門人請自視脈。君笑曰。予察之審矣。且出入息亦脈也。予胃氣已絕死矣。因盡屏藥餌。忽焉韻語數句。授其壻魏淵。蓋超然達者語也。後數日。與客坐語而卒。年五十八。時二月初六也。君性喜讀書。聞人有異書。購之若飢渴。書工日夜傳錄。君寒暑疾病。未嘗置卷。其藏書至萬餘卷。然皆以考醫方之事。晚好佛學。蓋有得焉。以是年閏九月二十七日。葬于蘄水龍門鄉圖佛村。君曾祖諱慥。祖諱震。及父皆不仕。娶陳氏。生二男子。曰璫。曰琪。皆篤孝修飾。二孫曰仲容。叔達。三女已嫁。魏淵。郭迪。陳翔。其壻也。各舉進士。君臨終以書遺予。若託以銘其墓者。嗟夫。予名微位卑。又方得罪于時。何足以爲君重。然君嘗有德于予。且其孫必以見屬。不得辭也。旣銘其藏。又著所嘗治而愈人所傳道者。更刻于碑陰。且以爲法銘曰。

生民之病。堯舜是醫。惟周與孔。世之良師。遘癘于身。扁鵲善治。惟民與身。同一矩規。猗歟龐君。有見于茲。獨顯以方。用不大施。孰疾于衷。孰毒于肢。有來求予。徑取無遺。飲酒著書。終身遨嬉。欲知其仁。弔者垂淚。卽化而安。不爽厥知。有考其書銘以昭之。

歐陽伯和墓誌銘

君歐陽氏。諱發。字伯和。廬陵人。太子少師文忠公諱修之長子也。爲人純實不欺。內外如一。淡薄無嗜好。而篤志好禮。刻苦于學。安定胡瑗掌太學。號大儒。以法度檢束士。其徒少能從之。是時文忠公已貴。君年

十有五師事瑗恂恂惟謹又盡能傳授古樂鍾律之說既長益學問不治科舉文詞獨探古始立論議自書契以來至今君臣世系制度文物旁至天文地理無所不學其學不務爲抄掠應目前必刮剖根本見終始論次使族分部列攷之必得得之必可用也嗚呼其志亦大矣然其與人不苟合論事是非非遇權貴不少屈下要必申其意用是亦不肯輕試其所有而人亦罕能知君者而君之死也今眉山蘇公子瞻哭之以爲君得文忠之學漢伯喈晉茂先之徒也初以文忠公恩補將作監主簿三遷爲大理寺丞賜進士出身勾當箔場遷光祿寺丞賜五品服勾當京西排岸司又遷殿中丞官制改爲奉議郎監粳米中第七界俄權少府監丞遷承議郎某年月日卒享年四十有六積勳至輕車都尉君爲殿中丞時曹太后崩詔定皇曾孫服制禮官陳公襄疑未決方赴臨召君問其制君從容爲言事在杜佑通典甚詳襄卽奏用之是時方下司天監討論古占書是否同異折中爲天文書久未就而襄方總監事卽薦君刊修君爲推考是非取舍比次書成詔藏太史局襄因奏言舊渾儀壞不可用而後所造新儀攷之又不合願付君詳定詔從之本朝自至道中用韓顯符渾儀其後司天官周琮于淵加黃道熙寧中舊器壞詔沈公括更造括以其意增損之器成數年未能定與浮漏景表不應君較三家攷古注又自因事立制先爲定儀奏之神宗召君問曰浮漏以玉筒下水者當堅久也君對曰玉不如銅沈括長用玉今下水比初加速矣上以爲然遂以君法鑄新儀漏表集其說號法要其後有附括議者訟于朝詔再定卒行君說訟者亦服焉君治官無大小不苟簡所創立後人不能更其著書有古今系譜圖國朝二府年表年號錄其未成者尙

數十篇。夫人吳氏，故丞相正憲公充之女，封壽安縣君。男一人曰憲，滑州韋城縣主簿。女七人，其四人皆蚤卒。一嫁權武安軍節度判官蘇京，次嫁承務郎王景文，亦卒。次尚幼，孫一人延世。曾祖諱某，贈金紫光祿大夫、太師、中書令，兼尚書令。曾祖妣李氏，封吳國太夫人。祖諱某，贈金紫光祿大夫、太師、中書令，兼尚書令。追封鄭國公。祖妣鄭氏，封韓國太夫人。初，文忠公以觀文殿學士太子少師致仕，累贈太師。追封竟國公。妣薛氏，累封安康郡太夫人。元祐四年十一月甲子葬君鄭州新鄭縣旌賢鄉劉村文忠公之兆，而憲來求銘曰。

嗚呼！伯和父學不欺其志，而不以爲利；非不售之畏，而不知之愧。豈與世爲懟？其將有所恥云誰之似？惟文忠之子。

商屯田墓誌銘

公諱瑤，字某，淄川人。曾祖重進，祖文俊，皆不仕。父餘政，贈大理寺丞。君登景祐元年進士第，爲萊蕪單父縣尉，臨沂縣令，知下邳縣，簽書平定軍判官事。以尚書屯田員外郎知襄邑縣，卒。年五十。至和二年正月二十七日也。階至承事郎，勳爲騎都尉。君少博學，爲文詞豪健，貌魁傑，嚴整不可犯。而平居樂易長者也。單父多盜，君以策鈎獵，梟綾且盡。盜怨毒入骨，罷官還鄉。次大澤中，夕有叟密來語曰：「林中有惡少年，十數操利兵而伏，期今日必殺單父尉。是君非耶？」君從者懼，欲亡去。公執弓矢徐出，有大木去百步許，望之中有空焉。公謂其人曰：「我爲若射彼空者，再發皆中之。」林中惡少年大懼，爭先遁。其治下邳，決訟多辯諭。

勸說之不盡臨以法民始鬪怒中忽喜悟相與請平者常十七八老猾吏旁瞪視不得刺手父老戒子弟曰若忍犯此令乎富韓公守青州聞其治狀數委公決難事始君爲包孝肅公知韓忠獻公器公見必訪以世務而公無所苟合貴人終不肯出氣力引挈之其智中不少槩見而死矣先妻劉夫人繼室王夫人封壽昌縣君三男子皆已卒一孫求之舉進士女二人曾孫一人尙幼公之從子太學博士倚以元祐八年十月日將葬公淄川萬年之原以二夫人祔而博士又以公之爵里行事告于著作郎張某曰子史官也凡世有善而無傳則子有罪某不敢辭乃爲詩使刻石墓中曰

天下平治士無功名才否一區之死無聲或宏其聲而中乃榜竚實靡計孰昧孰昭有淄商公甚畜不施時棄其苴則已光輝彼不人逢位下固宜嗇不使年造物則奚

劉承制墓誌銘

君劉氏諱充字安道開封人娶宗室女補右班殿直四遷爲內殿崇班騎都尉致仕今上卽位以恩遷內殿承制年五十元祐二年二月某日以疾卒嘗監許田太康二縣酒稅用舉者監真州船場待制李肅之守慶州辟公隨行又勾當安肅軍榷場用舉爲霸州船魚巡檢徐州兵馬都監其在霸州卒有謀叛者發有日一州無知者君獨以察得密白守驗實斬之微君幾擾間罷官居京師官府有煩使時時猶奏遣君至輒辦用此能自達于名卿大官故其居官多薦之者其爲人勤敏當官不避事頗知書矜持自喜有足賢者也曾祖某某官贈某官祖某某官贈某官考某某官贈某官夫人鄧州觀察使從贊女二子俟左班

殿直傑舉進士葬開封府某縣某鄉之原實某年月日銘曰  
仕則有稱既憊而休不瑕孔修以息茲邱

吳大夫墓誌銘

公吳氏諱某字德仁龍圖閣學士贈太尉諱遵路之子也太尉爲時名臣公少以父任補太廟齋郎年四十六以虞部員外郎知郴州罷官歸京師卽上書請致仕方是時上自執政大臣下至搢紳士大夫凡知公者相與出力挽留之不聽蓋始聞而驚已而皆歎服以爲不可及相率賦詩飲餞于都門公旣謝仕歸蘄春有薄田僅給伏臘公臨溪築室種花釀酒家事付子弟一不問賓客有至者不問賢愚貴賤與之飲酒必盡醉公或醉臥花間客去亦不問也客有臧否人物公不酬一語促左右行酒客不得卒語人皆愛其樂易而敬其高凡見公者皆欣然忘其鄙吝焉嘗有貴客過公而飲公酒酣而歌以樂器扣其頭爲節客亦不以爲忤其放誕乃如是平生視財物如糞土未嘗與人較多寡太尉薨時其妹婿輒以家錢數千貸人其人不能償公哀之曰是人有母聞之將重其憂乃召其人諭之焚其券嘗有客爲公治田事二十年謝去見公欲計之公取前後文書示之乃未嘗發封盜夜入其家公覺之不問且取其被公顧謂盜曰室中惟所欲大寒幸舍吾被凡見公外者徒知其真率曠達至究觀古今治亂成敗人物之賢愚臧否其中了然甚察也其積官自太廟齋郎至朝奉大夫勳至護軍賜至三品服歷官自監西京竹木務簽書淮南判官廳公事監真州榷貨物通判池州黃州乃知郴州其治官主于忠信仁厚故所在有稱哲宗朝

有薦公者詔落致仕赴闕而公堅臥不起卒年八十四崇甯三年四月十一日也初公感疾卽閉閣謝藥物至屬纊不亂或言公少遇異人服其藥故壽而康甯亦其潛德美行不究其位故享其報如此公娶張氏繼李氏封德清縣君三男子曰禧蚤卒曰升曰奕皆舉進士四女徐暨張之儀徐閭胥彥博其壻也是歲七月某日葬公蘄春縣永福鄉新安里芙蓉山以李夫人祔焉曾祖諱文大理司直祖諱叙尚書職方員外郎秘閣校理贈尚書右丞升匍匐乞銘于謙郡張某某熟公之名迹且愛慕之無窮則銘之也實宜銘曰

吳公出延陵以國爲氏而始居京師者自司直君老子蘄今其子孫遂家蘄春嗚呼德仁夢幻斯世遽廬其身寓百年于一醉兮不以萬物易吾之眞人何足以知之抱所有以滅泯殆古所謂得道逍遙御風騎氣之人歟



# 柯山集卷五十

## 墓誌銘

李參軍墓誌銘

公諱處道字深之吾先君子之友也自言系出唐太宗皇帝五代時有諱澄者嘗爲梁使閩遂居晉福之連江故今爲福唐人公性剛特耿介不羣少孤貧自力學問記覽淹博工于文辭某少時猶及見其賦篇其文贍麗雄放屬比精切一時望士皆慕與之遊名聲絕輩行矣五舉于鄉中治平四年進士第初調陳州南頓尉更成州同谷處州縉雲泉州德化令建州浦城丞南雄州始興令最後爲興國軍錄事參軍以卒令同谷時公與轉運使厚善知州孫京不法欲因公自託公不可京怒所以据公萬方卒無所得然猶以公坐免縉雲有女子徐自號菩薩家有井詭言能治病趙清獻守杭亦信之嘗求其水由此羣無賴爲倡議聲動數州所居成市公怒捕徐杖之塞其井初清獻聞之大驚無幾何徐氏生子遂皆服福建轉運使賈青繫福州衙前數輩劾其盜督以贓必欲論死獄成不引伏公令德化以獄屬公公緩其獄竟青去部卒出之始公知其冤欲直之既而思曰直之則青怒必以獄他付誰不畏青者則此數人無類矣姑緩之而覬其去卒如公計焉浦城民有自稱徐偃王之神頗動衆公捕械繫之民初不懼猶陳說鬼怪一邑

惑之公以寘干法始興嶺外小邑前令多以富歸公罷無南中一物束書而還始興人至今道之其在興日公已老且倦遊矣猶力治曹事無所苟數年反重囚得免死者甚衆罷官而子援爲鄂州武昌尉迎養公子官卒年七十五公性純孝信厚不逮事其親每忌日則涕泣感慕戚見于色撫兄弟之孤過己子平居雖與僕妾語必誠必信既老且病猶不廢書時時與賓客飲酒賦詩其詩句甚工然多悲壯感慨聞者哀之有文集十卷藏于家先娶林氏繼室龔氏先二年卒三男子據抗援據蚤卒抗援皆有文行援舉進士中第矣三女嫁趙僕何顏陳任五孫其二男也以某年某月某日葬公武昌樊山之原舉二夫人祔焉曾祖郁故贈虞部員外郎祖汾故贈工部員外郎父餘慶故贈屯田郎中始公與其兄載之皆友某之先人相好也某嘗從公于姑蘇之學官故公之子姪往往獲交焉諸孤以銘屬我宜也銘曰

堯理之後氏李子唐宗赫赫自成紀惟澄胄出貞觀帝使閩不歸連江沚猗歟深之文有斐內懷剛方志孔偉六遷州縣臨輒靡力抗豺虎傲爪齒讞疑伸枉脫垂死械神鞭佛破訛詭彼民于我父母視我有甚富見無幾豈其愛之莫吾以樊山之藏非其里後望武昌自公始

王夫人墓誌銘

夫人王氏曾祖沔事太宗真宗爲執政號名臣祖睦尙書司勳員外郎父乙尙書庫部員外郎庫部主簿于咸平時夫人年十六丞相晏元憲聞其賢爲子虞部君娶之夫人家中微起嬪相門能以禮自持接上下有則堂無姑夫人宰家室內外無不允者元憲嘗曰吾無憂矣夫人寬裕而好禮簡儉而樂施夫族有

負市易錢百萬者夫人爲出所有償之次子方提孩其伯父以爲己子奏得官後伯父失官子未官夫人曰吾子可教取補牒還之以虞部升朝封春安縣君又以長子恩改封崇德縣太君而元憲薨時仁宗臨奠面賜冠帔生三子長某朝散郎次藻先夫人卒季銓左班殿直監黃州酒稅樂善好學敏于爲吏職從予遊甚善也方夫人疾革銓嘗剗股肉以進三女長嫁某次嫁某孫男十一王氏舊爲霸州文安人自司勳始居開封之咸平今爲咸平人以某年某月葬潁昌陽翟舊學鄉合于虞部之墓銓求銘于予銘曰隱而聞于顯微而立于貴吾何爲哉終始吾義有子而孝歸從其良儀爾山川德音不忘

福昌縣君杜氏墓誌銘

某先君之執友曰長沙李公諱竦與先君生同年其應舉得官遊宦四方禍福淹遠多相似也某爲兒童時兩侍先君遇公于京師其出入遊處必相與偕其議論談笑率常自旦至夕繼之以夜其僕役至憊言不能支而兩公未嘗倦某時竊聽之則其是非好惡十嘗同八九已而別去則兩家之書問必以時至蓋李公之與人其傾倒言笑若無不可而于節義廉恥之際其彊禦甚嚴且固也先公前公且十年歿而公晚稍被任使屢使諸部卒以無所附離不大振顯也元符二年某得罪謫官黃州而公子之子廷老寓書狀以其母杜夫人之行來求銘其墓蓋後公之卒又十餘年矣嗚呼先君同時之人盡矣昔之兒曹皆已斑白矣而某又得罪聖世幽憂無聊不得齒于平人其閱人之盛衰存亡未嘗不動心悲懷不能自己其尙忍聞其不幸而銘其墓哉雖然不可已也姑次序其狀夫人洪州人天章閣待制諱杞之女天章在仁

宗時號有風力名臣夫人生貴家自幼嚴飭好禮不妄笑語天章公爲擇對久之迺以歸李公而姑朱夫人老且病又素剛人少能中其意而夫人在旁輒歡公之弟妹未婚姻者夫人出所有爲成之無所愛也李公素貧不治生事夫人爲均節其有無以濟由此李公之仕宦得以直己行義而不累于私以李公登朝恩封某縣君旣寡居乃歸心于佛奉其教讀其書若有得焉紹聖五年十二月二十八日終于道州司法參軍楚老之官舍年七十曾祖某某官二男子長廷老衡州衡陽令次楚老四女嫁太博學士虞蕡福建轉運判官檀宗臣大理正張近衡陽縣令關沅孫男女十有六以元符二年十月合葬夫人于荆門軍長林縣白陽鄉李公之墓銘曰

惟婦之德順以莊旣莊而和順以方夫人蹈此有耿光而享不豐後其昌

李夫人墓誌銘

故大理寺丞王君諱竑之夫人李氏真定人也司空贈尚書令韓國公諡文正諱昉之曾孫金部員外郎贈禮部尚書諱宗諒之孫工部郎中天章閣待制贈太尉諱邁昭之子也夫人年十有八歸大理君性純孝敏靜奉事舅姑能先意集事飲食衣服非經其手不以薦而舅姑亦曰非新婦所爲吾食不甘服不安也宗黨相教以爲法夫人之舅與其從弟同時拜天章閣待制從弟家治黃金帶爲燕服夫人顧舅家貧不可得悉其匱中物易金作帶藏之待制出守陝州盛服燕客夫人出帶使大理君獻之而家人初不知與其夫處如賓客骨肉有不至必面規切之退則更譽其善故聞者信而不怨大理君通判夔州卒于官

一男始生夫人獨護其喪還京師道峽中舟敗舟人捨舟而逃夫人正色叱之命取柩挈兒以免然家無長男子道遠從者慢夫人輒能言之官府鞭罰之以寡婦行艱危數千里無敗事而內外始知其才非獨辦夫人常職而已也既寡居杜門雖父母家至有時留之宿不可曰吾非間吾親顧年少子幼理可畏也子長躬教督之慈而不驕予以有立今丞相范公之配英國夫人大理君之妹也英國幼時得危疾久未平夫人晝夜調護有恩意英國歲時躬省勞之良厚以相府恩錫夫人命服元祐四年夫人年七十矣得疾不肯御藥物家人固勸之夫人曰吾無不足者又獲託死于英國求生何待也左右趣爲我沐浴更衣遂卒五月二十四日也一男曰約宣德郎四女長嫁隰州錄事參軍劉損次嫁奉議郎權通判火山軍葛繁次蚤卒次嫁殿中丞鍾離景圭前卒是歲六月七日合葬夫人于開封府開封縣大邊村之原大理君之墓謙郡張某曰嘗讀太史公書見其爲滑稽日者作傳而不著列女孔子叙詩首關雎著后妃之德夫女德王化之本也豈小補哉顧隱沒不稱而賢賤士未術于勸善未至也惟夫人之德之才其于死生之際蓋知之矣此十大夫之所難而可以無傳乎于其葬也而銘之曰

有天其葉旣葉旣實旣蘞旣佚而以始卒諷良塚吉殯夫子穴是謂大畢

張夫人墓誌銘

中散楊公諱希元夫人張氏亳州謙縣人贈禮部尙書諱成之曾孫禮部侍郎諱傳之孫贈太常博士諱彭之女也夫人秀美惠和治女工精工絕人內外宗族無與比蚤孤母燕夫人篤愛之曰有男子如吾女

者乃以歸之媒妁日走門燕夫人輒揮之曰吾女非若輩偶時中散公與夫人之叔爲寮來請婚燕夫人素聞中散公賢又竊奇其狀貌爲有福祿者曰是足以當吾女矣遂歸中散公夫人旣歸楊氏其宗族敬愛之如一夫人仁愛慈淑出天性柔聲怡色無絲毫忤人意其子妒忌生不知有也年尙少能淡世慮齋戒奉浮屠不治婦女玩好年三十六歲感疾少間召其家人婢妾環坐酌酒飲之勸撫之如他時皆喜曰吾夫人疾且起俄而正衣起坐家人驚問之已卒矣後二十七年當元祐三年而中散公卒諸孤迎夫人之柩于京師是歲九月丁卯合葬鄭州管城縣懷恩鄉神崧里先塋之次始以中散公登朝恩封壽昌縣君追封清河郡君子四人彥真彥齡皆宣德郎彥臣慈州吉鄉縣令彥章絳州太平縣尉五女長嫁左班殿值李祐次嫁左藏副使曹譜次嫁朝奉郎程復次嫁大名府魏縣主簿王需次嫁河南登封縣尉李昂孫八人長達次邁皆太廟齋郎餘尙幼夫人于某爲從姑故諸孤屬之銘銘曰

擇所宜從初艱其歸旣逢其良身先之萎匪謀不臧天實戾之於穆夫人令德婉婉物皆怛終獨裕其返惟昔弱子衣冠頃頃逾二十年以喪而歸鮮原靡靡從于君子有蕃其承視此松梓

王仲儒墓誌銘

河南王叟者齒少篤于自修好學而能文予聞之而未見也紹聖四年予以罪戾謫官齊安一日有客墨衰造門視其謁叟也見予則泣而言曰先君與子舊矣叟不幸旣孤將葬而無詞以刻先君之墓敢以是屬諸子某曰予嘗見朝奉君子京師其深者某之陋所不敢知而其粗與夫衆所譽者竊聞之矣不曰篤

躬好學而廉儉者歟敏于爲吏愛民徇公直己不撓于權者歟然其人厚于實而薄于名豐內而廉外世之君子未必知之予嘗辱聞焉則屬銘于我固宜謹取其爵里行事叙之曰君曾祖諱恪西頭供奉官祖諱淮越州諸暨主簿贈太常博士考諱起尙書屯田員外郎秘閣校理贈左中大夫君初補太廟齋郎調陝府湖城縣尉又爲灘池安邑二縣主簿河中府猗氏縣令改宣德郎監解州鹽池兼知縣覃恩遷通直郎賜五品服知孟州溫縣遷奉議郎加武騎尉管勾京北排岸司遷承議郎加雲騎尉監京米倉遷朝奉郎知德州加飛騎尉紹聖三年五月二十六日卒于官享年五十以某月某日寢奉君之喪葬于河南府某縣某鄉某原以夫人楊氏李氏祔焉銘曰

君諱仲儒時中其字世河南人河清其里以蔭筮仕湖城是尉湖廢官罷留君一歲實惟相絳從湖民志其在安邑涌水于野邑人走祠君鞭而罷後令猗氏有愛其民旣去十年見之如親實其耆老以謂子孫民居侵遠使者議毀君舒其苛一道是賴安邑賈鹽民富悍豪君教之學獎禮其髦孝秀聿興鄙悖滋西民饑師履產輸泉君力弛之鰥寡用安令溫治盜曰姑安之勿浚其姦吏逸民嬉盜悔而耕厥壤大滋消邑豪坐獄重賄而逸君以奇購唾手則獲君之去溫其民涕留耆老百千聲言于朝惟河內溫邑聯部異河內有請假君決事後守德州河溢而驚羈民流殍所活萬數伍長悍驕其將笞之長以衆逃斥將之疵君請長叛立寘于罪貸將不問境爲無事一時持權爭欲用君勉之比周君爲不聞云何不淑五十而債君凡三娶皆有婦道粵初氏楊其父日慥繼李父周學士集賢今夫人陳姻黨稱焉劉時張鬪又楊克中

增其三子惟德之同君三男子惟饗在耳進士登科甚飭而藝陶牙之原鬱乎松楸乘者下之君子之邱

吳天常墓誌銘

公諱天常字希全河南府洛陽人惟吳氏之先與周同姓至越入吳子孫散居四方以國爲氏公自祖考始占籍河南之洛陽公少貧不治生產以氣節自許力學問河南大府號多士而公自少已知名里中而舅建寧軍節度使王正倫深器之以正倫死事恩爲郊社齋郎調濮陽縣主簿又調舒州司法參軍郡大猾章氏數犯法繫獄其勢能得于有司公論正其罪流之一郡畏伏遷泗州盱眙縣令守笞病人死公當覆驗而前驗官言死者不病公將直之守以利唱公欲得如前驗公謝守曰我受公恩固善如死者恨何卒直之守爲得罪知洪州奉新縣奉新號難治訟者或先以釘貫其足以脅有司公畫巨釘于市令之曰釘必如此則受訟乃稍變俗知彭州永昌縣轉運使范公純仁深知公是時方變差科爲免役錢公原究蜀役法利害講之至精後以書見王荊公荊公召公議于司農寺時欲舉江西役法行于蜀公曰蜀不足于地江西不足于民利害異宜恐不可行主者是公議久之公所陳浸忤遂罷歸審官調院簽書鎮南軍節度判官丁母憂服除以便親調蘄州蘄口鎮都大監轄俄丁父憂服除通判無爲軍公諷軍守興庠序勉士以學部有礮池官專利民多冒禁公爲立法公私便之而犯者鮮改通判鼎州以朝命按知誠州周世隆帥司部使者皆欲致世隆于罪公言世隆習蠻事且未嘗有罪論執甚堅卒免世隆人以爲難辰州有軍事以公攝守公之官見屬縣吏部夫千餘挽木山間公曰方春役民妨農耕悉罷之公至郡蠻酋繁

獄者公諭以朝廷德意盡遣之皆感泣而去公因言自誠州抵融州道新通請每三十里建一佛寺擇僧知蠻情者居之諸蠻信佛平時可使入蠻與之習熟有警可用以間諜而佛舍可因以儲糧其利邊甚大朝廷許之後爲諫官言不當廢誠州爲軍公言頃蠻所以數叛者蓋雖輸款而未嘗去巢穴一失撫循則亂稍內徙則定矣雖不致州尙可安事廢州乎是時方議役法有訪公者公陳三事謂州縣之役莫重于衙前今雖易雇爲差衙前數之多寡與役之優重請守熙寧元豐之舊毋輒改又言鄉差于官類不知書計勢必雇人代者必要厚價請官爲立直又言縣所積免役錢請皆納州或輸旁郡戶部皆奏行之用薦者除知宿州時荆門新復軍擇守乃以公爲知軍宰相召公諭以擇才之意軍久廢百事圯毀公至爲興起弊敗必使完好可持久不爲苟且計人至今頌之俄知沅州其去荆門人爲立祠歲時父老率子弟拜之公旣習知蠻情其治沅務安靜嚴守備撫溪獠久之奏請出巡邊防軍行有告帳下謀變者公獨保其不然罪告者卒如公言又檄諸縣案使察游民與蠻交易爲嚮導者捕之俄復知辰州公去沅如去荆門而辰之吏民與蠻酋皆相賀曰我公復來矣蠻相約無犯邊郡爲無警辰民春夏多疫公飭醫工親視藥物人賴以全甚衆乃立學校勸以讀書人皆服從風俗爲變朝廷旣知公有功南邊將用之矣以病求告卜居蘄州金沙溪上家藏書萬卷有以自樂泰然也公喜讀書于書無所不觀自少至老未嘗一日廢卷至其閒居好之尤篤有詩集三卷奏議三卷紹聖四年八月六日以疾卒預治終事至屬纊精爽不亂享年六十有一公曾祖諱延慶祖諱澤皆不仕考諱英以公登朝恩授大理評事累贈朝議大夫三男子長

忱。太廟齋郎仲惇未官季悟假承務郎皆以進士知名三女長嫁萬載縣令黃公孺次嫁進士胡世南季嫁寧州錄事參軍譚康世公自濮陽縣主簿積官至朝奉大夫積勳至杜國公爲人厚重寬博達于爲吏官無大小所臨必有績當其有所建立必得所欲而後已或以利害怵之不顧也其仕宦多往來南邊故深知溪洞諸蠻所以治亂有所措置後不能易然攷其大體本于安靜寬簡不爲苛擾而頗立隄防明條教期無亂而已不徼有功也君子謹之公少嘗從丁寶臣學寶臣異其才薦于歐陽文忠文忠稱焉旣仕則不苟取知于人而一時賢公卿咸知之獨吳正憲知之尤深而公自重不輕就人故雖知之不絕出力而公才見于世者如此而已也其孤將以元符元年八月二十有一日葬公于蘄春縣安平鄉黎企里啓先夫人之兆而合焉夫人程氏有賢行封文安縣君前公二年卒云銘曰

其直非以爲訐其和非以爲悅也獨盡力于爲吏無劇易必達也其至民以爲賜其去民以爲奪也旣或知之矣乃掩而不發也進嗇而退果而後知公之節也安平之塚公藏惟列尙語後人洛陽之吳也

潘奉議墓誌銘

齊安有君子曰潘昌言其學也正其言也文其家居篤于孝悌其爲吏清介刻苦而爲政本于惠下愛民至大吏勢力能寒熱人者必與之較義理一毫不爲屈其爲人務內而簡外信己而不求人知而人之知者必皆誠心愧服焉嗚呼君子哉蓋紹聖丁丑歲某得罪謫官于齊安曰幸得從君遊旣至而君病矣無幾何而卒實元符元年十月某日也齊安之君子皆相弔已而又曰潘君之墓宜有銘矣咸以銘事屬某

某既素高君之義用不復辭走其家哭之求其世家歷官行事于其子大臨而次叙之曰潘氏在唐爲榮陽人當僖宗時有名季荀者仕爲太僕卿官于福州避亂因家焉季荀之弟曰季翹爲太子司議郎季翹後二世生吉甫事吳越入朝終國子博士累贈工部侍郎侍郎生衢爲屯田郎中屯田嘗官于黃遂居之屯田生處士革隱德不仕君諱鯁字昌言處士長子也生而儻警絕人爲兒時賦詩已有奇語閩有周希孟者博學篤行之士也君從之學希孟以爲盡己之道君居鄉里以經教授聚徒常百餘人後進皆師尊之登元豐己未進士第初調蘄水縣尉遷和州防禦推官知江州瑞昌縣監楚州都鹽倉遷吉州軍事推官改宣德郎監漢陽軍酒稅遂以奉議郎致仕卒年六十三蘄水民有以花爲獻者君一嗅而還之曰受賜多矣其廉潔類是江州賦屬縣鬻建茶太守問君瑞昌歲可售若干公曰四斤耳守驚詰其說君曰縣小民貧米鹽猶不足而暇及茶乎獨縣僚四人人一斤可矣守悟以故諸縣皆得無多售而旁郡有賣千斤者後七年君以事過瑞昌有兩民拜馬前其一曰異時君爲縣我訟得直其一曰異時君刑我當罪我心服是以偕來君之爲吏得民舉如是也元祐赦民負官錢無姦者悉免之吉州通判攝守事乃悉下負者于獄將鞠其姦君曰赦欲寬之而君故獄之耶執不可民乃得免龍泉令捕得私酒三十家將上府君謂令曰是法皆當徒龍泉小邑一日徒三十人君爲令安乎令乃頗減出之嗚呼其歷官微而見于行事者寡矣然其修身治人立心操術亦可概見矣向使之得富貴立朝廷據位操柄以行其義達其道其不貪利苟得如還蘄水之花其忤上愛下如鬻瑞昌之茶民甘其罰如瑞昌之拜者則雖古之君子無以加

分寸于此矣。有集三十卷。曰春秋斷義者十二卷。講義者十五卷。易要義者三卷。致仕時家無一金骨肉衣食僅給。而君蕭然病臥一榻。口不及俗事。時與其子清言而已。娶何氏。有賢行。男二人。長大臨次。某皆力學有文。一女嫁進士羅啓宗。四孫。其一男也。曰憲。以某年某月某日葬某縣某原。銘曰。

白璧芳蘭。包以九襲。長于外者千萬而一。莫爲出之。卒殯無施。嗚呼昌言。不幸類茲。致美在裏。不耀于肌。豈人是謀。謂天實知。黃岡之原。松柏其猗。我相後人。將穫其菑。

# 柯山集拾遺卷一

## 五言古詩

有所歎

達士不可羈。其次遠羈絆。我無達人風。又不能自遠。紛紛隨世俗。碌碌走薄宦。其來或遭驅。其去或被挽。吾求亦何有。五斗固易辦。不師陶淵明。腰爲小兒俛。由來爲貧仕。榮辱何敢辯。乘田與委吏。孔子不云賤。

卽事二首

大明海底生。先警我東牖。老人雖未起。曉境默相授。山前羣動寂。暗樹語鶴舅。昏昏橫水霧。落落欹曉斗。廚人已束蘊。汲井鳴盎缶。沽酒走家奴。理食咨竈婦。悠悠春復冬。冉冉昏還晝。通塞付大鈞。聊安此微陋。鬻塵屏繁務。幽獨會夙心。惟時孟春月。微祿歸園林。下有宋微逕。上有知時禽。終日自嘯歌。寂無鄰里音。冉冉溪日下。悠悠山靄陰。興闌下絕巘。新月出遙岑。

晨起二首

仲春忽過半。長養候已深。晨興雨初霽。近目矚平林。繁桃張麗錦。好鳥鳴清琴。樛枝有新子。翹草無陳心。謫官傷局促。端居厭滯淫。眷言平生友。乖隔如參辰。

窮居無遠念。暇日親庖廚。澤國富滋味。春江出嘉魚。鬻市有懸羔。擲園得嘉蔬。雖無五鼎烹。薦俎頗有餘。導和資一杯。徑使愁肺蘇。條味以實氣。聊以彊吾軀。聖賢戒求飽。豐德任形耀。彼皆勤勵智。我獨懶求愚。

晨興

喔喔雞向晨。夙興鄰里靜。朝光出東崗。秋曉氣耿耿。亭亭脫樹葉。寒意已疏勁。草根有微露。釀綠尚交映。老夫起默坐。覽物感衰盛。忽然遇杯酒。酣歌朝達暝。

朝日

朝日照山堂。流光泛疎牖。龍鍾病童子。掃地起持帚。堂中空四壁。惟一老病叟。蕭條野僧閑。鄙樸老農陋。雨來林葉響。霜近蔬甲瘦。何以遣幽憂。賴有尊中酒。

晨起有感

故歲如曉客。行意不可留。新春如美人。含笑未舉頭。定知當粲然。有待姑少留。山川譟光景。梅柳露風流。惟有堂中人。一衲暖蒙頭。榮枯不到心。萬事良悠悠。

東池

東池秋水清。歷歷見沙石。枯荷半倒折。風起鳴撼撼。悠悠岸邊菊。灼灼好顏色。芬芳人不知。寂寥聊自得。寒蛩白日啼。晚葉霜餘赤。無人野竹繁。積雨平橋側。喧喧雲閒鴻。歲晚霰雪迫。乘閒輒獨遊。官閑幸無責。

東溪

東溪何潺潺。秋水清見底。縱橫小石圓。一靜無渟。空山人不到。澑澑響環佩。我來每終日。漱濯弄清泚。山居時已久。不省有朝市。門闌人客少。跨馬必至此。麋鹿見我熟。相對不復起。誰知寂寥趣。寄言同聲子。

薰風

薰風動嘉樹。日夕成清陰。上有枝閒鳥。知時爲好音。陽春事已往。桃李不可尋。賴茲長養功。嘉實薦中林。庭虛納涼吹。雲表見遙岑。我歌虞氏詩。諧此風中琴。

六月五日苦暑

朱夏忽云季。金流火方燃。遲遲朱輪出。濯濯高雲鮮。困翮守茂樾。游魚伏深泉。炎炎萬物息。聒耳唯鳴蟬。白羽誠么麼。爲功諒徒然。那能解煩促。揮肘增勞煩。大鈞播一氣。寒暑遞徂遷。欲逃旣無所。聊此北窗眠。

六月八日苦暑

微颺不振髮。皎日沸重淵。萬木奪華采。祝融方燎原。青山瘁無姿。流泉不復寒。眷彼道路子。念茲農畝勤。荷鉏詎敢後。擔囊無息肩。亦知苦可畏。謀食敢遑安。三伏方肇序。金融未能完。聊安環堵居。酌彼溪中泉。

又

羲和午停車。草木靜若萎。我居倦煩促。誰與開我懷。出井泉失冷。迎涼幌空開。翩翩投林羽。飢渴復誰哀。仁哉林閒風。爲我時一來。惜哉爲功薄。隆赫安能迴。觀濤感巨壑。清嘯想高臺。徘徊滯心賞。恨望意悠哉。

秋興

八月禾黍熟。登高望川原。山河豁清霽。風日開明鮮。晴光散草木。餘爽厲淵泉。飄飄孤飛鶴。擊搏無留拳。幽獨感搖落。端居驚歲年。誰爲知心者。賴有濁醪賢。

又

秋日照荆榛。空山莽蕭索。人稀雞犬閑。古道轉城脚。旗亭數家市。炊烟起離落。牛羊暮求羣。歸鳥紛落泊。菅麻已在漚。黍稷行可獲。歲豐農工勤。膏火通夜作。嗟余何爲者。愧與衆同樂。南畝亦易謀。咄嗟我力薄。

又

寒日在東屋。鄰家晚雞啼。闌班黃葉地。白日蟲鳴悲。揚揚舊香草。白露彫華姿。雖悲就搖落。所喜實離離。幽雅敘衣食。備寒戒先期。薪芻旣收斂。酒醴亦時施。嗟我無一塵。薄游倦東西。眷言及農畝。歲晚空咨嗟。

搖落

搖落已可悲。况復值春晏。山深雲物陰。所向皆慘淡。疎枝綴陳葉。風至時一散。壞壁畫蛩啼。衰草飛蟲戀。嗟余守窮谷。秋物已三見。胡爲久淹留。不自厭貧賤。由來人閒事。利害喜相半。優游歸隱約。富貴足憂患。安行吾不迷。夷路坦可踐。保此頑鈍姿。悠哉復誰怨。

九月一日有作

悅悅日光薄。蕭蕭風葉吟。今辰九月朔。秋物半侵尋。賴有堂下菊。芬芳散浮金。感茲搖落際。採擷慰孤斟。木落見南山。池清照疏林。翩翩短羽健。杳杳潛鱗深。落漠苦無趣。屢空阻抽簪。晴明躡吾屐。晚歲多重陰。

觀池灘有作

清商初用事。力弱殊未完。假此通夕雨。遂收祝融權。平池舊深淺。亦復波浪翻。白鷺飛不下。高荷沒青圓。是日酒初熟。芳香滿金尊。三酌徑就酌。此懷誰與論。

七月十日雨炎暑頓解有感

空山風雨夕。微雨淒房櫳。徂年兆搖落。感歎白頭翁。謫居困炊玉。無田願年豐。欲持一杯酒。旁舍慶老農。烈日辭純扇。高林墜晚風。清燈夜齋靜。不睡獨聞蛩。

出伏調潘十

伏盡熱隨盡。古語常有憑。淮南歲苦旱。秋暑鬱方蒸。老火熾而饑。弱金融未凝。火雲大江沸。烈日羣山賴。平生白羽扇。揮拂何功能。蓬頭臥永晝。起冠汗沾纓。柯山屢空子。貧病復相仍。衡茅未可詣。作詩問寢興。

九月下旬有作

今辰九月末。秋物能幾許。翩翩風中葉。卷卷自飛舞。餘姿不復妍。日夜逐塵土。寥寥空枝高。但有寒鳥聚。天時不汝留。變化竟誰主。今古無奈何。悲歌徒自苦。

又

慘慘歲云暮。塞日無停光。况復陰晦多。景短重雲長。梳頭坐清曉。朝飯熟黃梁。官閑無事業。終日偃空堂。經時不跨馬。門徑秋蕪荒。惟有霜後山。當簾對蒼蒼。

白月

白月照世界。山河受清光。豈獨耳目清。瑩洗肝膈涼。中夜掃寬虛。仰得天一方。湛碧磨青銅。精金點星芒。我心方無思。偃息在高堂。慎勿憂世故。彼昏謂汝狂。

初晴對月

平生愛明月。豈以解煩燠。及茲霜夜對。任使體生粟。冰天凝紺冷。氣祲避不觸。煌煌七金徽。但掛寒斗曲。蕭蕭替葉葉。悄悄鼾眠屋。三更清到骨。亂以杯中綠。

雨中晨起

端居多滯念。秋至一蕭散。况茲炎涼異。微冷風雨旦。空山陰靄積。槭槭木聲變。絲衣感輕單。素褐催補綻。泥行苦長鬚。買酒不可緩。洗醕自迎門。一杯聊自勸。

苦雨

春淺天尙寒。雨多聲入夜。幽人不出門。坐惜梅花謝。庭竹未抽萌。酴醿將覆架。芳時喜病愈。淺酌供情話。趨世劇曳牛。投閒如噉蔗。因逢老農談。悔不初學稼。

雨霽

滯雨忽雲霽。園林有清暉。時鳥亦和鳴。好風清且微。遠愧深山僧。趺坐掩禪扉。豈知芳菲歇。詎傷寒暑違。一念與道寂。九旬淡無爲。跔心探斯理。吾今其庶幾。

賀雨拜表

羣雲雨事畢。振旅不復陣。掃天無一塵。千里還綠潤。晨朝大明賀。沙路萬蹄印。朝光泛翠瓦。佳氣去人近。頗避斧扆口。侑膳飯龍筍。願君愛物心。從此至堯舜。

春雨

南山多夕陰。夜雨復達旦。瀟瀟脫而已。零落雲物亂。陰沉晝生寒。閉戶守餘炭。官庭草木合。山吏午已散。悠悠對朝景。念此春已半。昨日櫻桃花。紛紛落如霰。天時不可駐。今古一嗟嘆。唯應痛行樂。此計乃最善。簪紳束我體。局促因游宦。何當有茅屋。放意行所願。

春雨

春雨不肯晴。春雲與地平。柯山數椽屋。晝夜傾簷聲。陰沉人意惡。但願醉不醒。園花知在亡。渠溜飄紅英。今年窮到骨。憔悴客江城。花時不得出。風雨掩柴荆。自我學道來。萬事一羽輕。惟有惜春意。未忘兒女情。齟齬可奈何。努力飽飯行。往日雖莫挽。來日豈無程。忽記祖燕公。佳句與帝賡。今歲隨宜過。寒食明年倍調作清明。

喜雨止

敬亭與吾期。今日雨當止。靜掃峰頭雲。秀色粲如喜。我慚無以醉。園逕欣細履。夜來四簷聲。添我北池水。破圩久不補。積潦齧其址。南人麥禾薄。稻壠魚尾尾。豐穰未敢望。疲餓何由起。飽食但高眠。自慚稱刺史。

仲春苦雨

仲春乃積雨。和景良未舒。園林阻幽步。塊坐守溫爐。中庭下水鳥。隙地長寒蕪。流紅委花外。渟碧漲池餘。商羊未悔禍。椒醑屢傳巫。豈惟政無補。多慚誠未孚。農事滯南畝。土功隳敗圩。悠哉欲何奈。濁酒且爲娛。

苦雨

重雲冒山椒。大江浸其麓。通爲一沮洳。哀此塗泥渥。居寄佛殺山。□趾厭局促。餘飄汙巾几。積潤繁篁竹。門前耕野靜。時得舒倦目。美哉百畝稻。整整照人綠。深蕪下白鳥。齋嶺明秀木。感此歌豐年。卒歲期飽腹。

苦雨

伏盡暑初變。西風作秋聲。瀟瀟晚雨急。達旦聲不停。陰暝雞失警。微涼肅晨興。湍流冒階闌。積潦被門庭。仰視天蓋低。玄雲送驚霆。黑蟬樂以逞。商羊方未甯。后土何茫茫。流潦浩縱橫。憂念在民食。敢私蘭菊榮。漠漠暮未雨。琅琅夜還增。嗟余但高枕。飽食愧疲氓。

春旱二首

大野拱連山。晴空轉規日。青春散坱奔。積水中蕩潏。欣欣見羣動。咄咄爭湧出。滯留無好懷。風景獨蕭瑟。離羣與誰語。塊坐守蓬蓽。卮酒樂餘春。沉憂畏生疾。

又

風雲閑益高。旱色起諸嶺。施生澤未渥。曉氣挾餘冷。飛沙礮桃李。碧草思耿耿。麥根不走地。稻壠臥陳梗。

蛟龍且偷安。雷電勢欲逞。憫農非我事。剛復念閭井。

春雨

浪浪簷前雨。晝夜來不極。青苔生空廊。蝸涎被四壁。出門無所往。端居守籠翮。嗚呼林中鳩。聒聒方自得。林花掃餘姿。高柳沐佳色。悠悠三月殘。春物行欲息。感之欲何奈。取醉遣朝夕。穿泥得新笱。紫籜裹新臼。從容婦子語。草草田野食。明日還復然。慵頑已成癖。

春旱初雨

春泥不沾犁。四月若三伏。哀哉麥無秀。父子壠頭哭。誰驚耽耽龍。霹靂震萬屋。從空倒江海。焦禍快一浴。終然震威怒。飄颻斷還續。晚陰涼觀闕。夜響起松竹。後時悲夏穫。入土喜秋穀。聊爲目前慰。未敢信果腹。豐凶繫。詳望歲走牲玉。我無憂民責。理此杞與菊。

庭菊

窮秋慘無姿。向。蓋枯槁。可憐中庭菊。灼灼顏色好。豈無風霜苦。所守良自保。清商振驅除。爾獨傲百草。煌煌中央色。嚴麗謝浮妓。山家有薄酒。爲爾數傾倒。嘗聞仙人術。採餌庶難老。呼童掃藥齋。遲爾寒英擣。

次韻蘇翰林送黃師是赴兩浙

昔見君納婦。今見君抱孫。先公力種德。子合大其門。何爲亦如我。有抱不得言。嶧嶢胸中氣。默默自吐吞。誰如東坡老。感激論元元。欲將洛陽裘。蓋蓋江湖村。旣係海若頸。又鞭江胥魂。意令仰天民。不隔項上盆。

我獨乞禪牀一氣中夜存。

次韻子夷兄弟十首

暑雨衆物成園林。粲垂實。官閒靡歲月。裨補百無一。委身作書蠹。檢姓就僧律。古味雖未亡。塵埃滿琴瑟。金馬聊代耕。淺郎亦爲官。何必歌五噫。遭非如伯鸞。物生各自遂。蕭艾與芝蘭。詩人亦多事。屑屑計鶉獵。愔愔坐歲晏。忽枉故人書。頗說清淮濱。卜築有幽居。歸興浩滿懷。端如果投狙。功名繫遇合。不遇欲何如。出門復入門。愧此櫨上馬。壯心磨不盡。撫劍還悲咤。感時高歌放泣古。幽淚洒端憂。蹇無成駕言。我心寫。少年初入路。見謂醒日少。春風牡丹市。走馬帽簷倒。知音君伯仲。騏驥與腰襄。五年復相逢。但怪酒醕小。經時不飲酒。廩薄入口衆。人間多是非。不敢盜鄰甕。二公洛陽日。想見飲屢痛。行求放湖海。種秫代官俸。閒宮冷于水。塊坐守編簡。時無蘇司業。何處見酒醕。新涼枕簟瑩。付睡與雙眼。念我南山苗。經年廢鉏鋤。文園得武皇。引疾常避事。佳哉意殊深。遺迹邈不嗣。揚公漫投閣。不禁問奇字。致身毀譽外。乃得免疑似。呦呦中林鹿。那得伏鞍銜。愧我蕨薇姿。塵埃敝朝衫。山人不歸山。頗被猿鶴譏。欲追甫白遊。千古感至誠。昔有獨醒士。絕口避醲醑。折楊得衆笑。無地至秦青。周詩念忠嘉。所貴食野苹。良時不可再。佳人難合併。

喜吉老甥見過

西風吹藜藿。秋色滿環堵。悲蟲語窗月。陰蕊開夕露。門閑賓客少。鳥雀任散聚。楊甥時過我。論詩朝達暮。新茶磨細雪。甘井漱清乳。恩恩貧家飯。藜藿不滿俎。頗言行有日。征艎下洛渚。喜汝將鳳歸。驚余髮加素。

老懦愁應接兒女較口語樂逢親骨肉情話到爾汝先君外孫子惟爾冠悽悽平生女頤兄宜爾有風矩長安木葉落雨送萬家暑涼風當沽酒爲我醉起舞

劉伯壽秘校

將軍卷金甲獨臥嵩山阿千金買峨眉晝夜飲且歌時平武庫鎖賂買戎狄和不復用英雄惜哉雙鬢皤延我寒夜歡清尊不辭多壯氣老未已醉來鬚屢摩充國年七十立功未蹉跎我欲勸公起拂塵揮舊戈公言一世中歡樂能幾何安用身外名功高竟消磨家住太室陽開門對嵯峨嘉肴薦尊俎有酒如江河度曲得新聲詞成自吟哦樂此常不足尙安知其他我愕不知答高賢固殊科馬援喜功名旅死遭譏訶陶潛雖放情但爲碩人邁公於二者間安處行逶迤寒廳有脩竹野泉漲微波不厭徒駁勤高車幸來過

送梅子明通判餘杭

東寒山水窟錢塘吳越都吾人神仙後厭直承明廬一舸去莫挽落帆風月湖蹁躚青衿子能誦先生書借問太守誰子雲蜀名儒家有王陽金清商奏簫竽相逢不妨飲坐嘯治有餘遙知子還日未厭浙江魚

送呂安禮

呂子有奇氣少年事詩書不肯衣逢掖而隨市井儒白綺霜雪袍朱纓貫金父大醉必走馬長呼挽雕弧興能有餘歎清歌倚簫竽春風動狂思夜席擁妖姝羣兒傍笑之謂子脫檢拘而我獨知子壯茲真丈夫屑屑五斗米其重無錙銖何爲愛瑣屑妄自苦其軀子亦愛我拙相逢每躊躇論詩夜齋靜秀氣出璠璿

遠官無與懽。見君心獨娛。如何忽告別。決去如驚鳬。矯矯黃鵠姿。枳棘非所居。清明擇士日。子豈久泥塗。  
送別動苦懷。乖離感羈孤。搔首歲暮天。詩成悲有餘。

呂尉醉中索詩爲別

吾友呂子者。其人藝且文。何侯綠沉鎗。顏皋弓六鈞。勿謂豪少年。詩書精討論。文詞踵騷雅。豈但驚庸人。  
羣兒事膏沐。眩粥倚市門。汲汲恐不售。惟憂貨非珍。子獨抱奇璞。九襲包衣巾。塵口自蒙垢。但畏人知聞。  
區區事邊幅。碌碌隨俗塵。顧我未免此。深慙非子倫。離別可奈何。高歌倒清尊。願子重輝光。去去翔青雲。  
送陳器之

投身落窮谷。黓默類囚拘。情忘侶木石。機謝友禽魚。粲粲陳夫子。文章德行俱。雖云相知晚。旣合乃不渝。  
我官洛水濱。君寄鹿山隅。孰謂百里遙。滿案堆君書。詩壇兩不憚。日夕鬪戈殳。我贈白玉璧。子還明月珠。  
今春子遇我。爲我駐驪駒。高懷坐披豁。一飲倒雙壺。聯騎失洛橋。據鞍遞歌呼。劇談燼飲燭。痛飲銷炎爐。  
首夏餘春妍。子還自西都。連朝守杯勺。芍藥正芬夷。插花烏帽傾。醉倒傍人扶。已別尙反顧。將歸重躊躇。  
官期子當滿。念別久鬱紆。况乃西郊道。恩恩遇行車。一酌不暇勸。矧欲盡子娛。亦知微誠薄。所惜違區區。  
親友義不小。况乃知心歟。忽忽流水濱。尙將執子祛。願子保多福。六翮縱南圖。永此金石交。皦皦堅終初。

別外甥楊克一

彈琴不須絃。意在宮徵外。濁醪分美惡。于道猶蕕芥。平生分別盡。獨此有涇渭。坐令劉石徒。笑我猶嗜味。

石常以油爲酒。秋風三十里。碧鱖兼紫蟹。參軍呼可應。肯使空樽對。

感遇二十五首

幽居念世務。頗復窺造物。通爲一憤憤。愚智更出沒。漏天呀不補。淫雨方蕩潏。豈獨無良苗。稂莠亦飄忽。惟餘尊中物。三酌便兀兀。此事頗有憑。時從散幽鬱。

毀竹伐梧桐。意欲困鳳凰。彼雖無食息。逸氣自高翔。鳳何求于人。人自欲鳴岡。麾之亦安有。庾子鵠在堂。昂昂青雲士。忍飢而擇糧。使果腹是求何。憂無五漿。

士生有輕重。初非他人爲。視身真千鈞。所壓無不摧。羣偷讓弊漢。喘走恐後時。隆中賢少年。長嘯弄鋤犁。白頭左將軍。歛衽喜得時。狠石掣紫鬚。老瞞受鞭笞。艱難永安詔。委國忘其兒。心知龍鸞人。不顧鴟鴞資。使無三顧重。一飽起相疑。

世無英霸器。俚叟誦詩書。不能靜邱民。安用稱唐虞。堂堂贊皇公。龍變誰可拘。邂逅逢可人。奮身爲謀謨。草書救深州。元翼終就屠。誰能叱邸吏。姦將立改圖。裴度書遺王。庭湊不能出牛元翼。李德裕語范陽邸。吏張仲武不敢納亡命。才謀相去可知。世必謂裴勝李。過矣。天方去大和。拔公去其都。十年奇才論。獨智羞羣愚。文宗將圖閹寺。先出德裕。德裕有奇才。論訓注之敗。

秋房燈火靜。客睡亦復安。弭彊力汲汲。涉廣心漫漫。白露下百草。心知歲將闌。彼微者啼鳩。職使仇蕙蘭。吾非蒿目人。初不與世患。淫雨作橫流。執蠡挹之乾。我師青牛書。不爭忌處先。旣自守吾寶。在辱亦何歎。

羣動同大塊冥冥含至精乾坤職覆載日月互昏明蚊蟲共一器擾擾一時爭推移付大化終古一空名  
大冬積嚴殺布令兆微霜淒淒中園木華委歛摧藏豈無孤芳者佳菊獨煌煌後彫雖爾德曷補蕙蘭傷  
炎劉運欲圮蠹孽依根生姦臣助斬喪主意不得行云誰知巢穴請劍有朱卿傷哉滔天禍成此直士名  
唐皇欲喪亂豺虎依山邱君王信李訓玉殿行戈矛繫狗不係首遭噬血橫流堂堂贊皇公委棄不與謀  
腹心主包藏爪齒以自衛折衝須豪英靖國用君子遐哉三五朝此道無不備晏嬰才婉管齊景不霸世  
商子德慚矣秦彊仍早圮

風霜凜已高歲月逝云邁蕭條陋巷士藜藿守耿介欲吐胸中語旁人笑言大漆室非近憂宜遭鄰里怪  
登高望海縣秋日麗玉京喧闐車馬音風震入青冥大明屬昌運戴白不知兵華衣美酒食婦織子孫耕  
生無係虜憂乃覺患禍輕請看五季世戰地猶榛荆

西京全盛日宮闕上參天建章千萬戶白晝下神仙金瓊麗雲日拱角壓山川一朝喪亂至兩觀入戈鋌  
漸臺旣已平長門隨風烟物大變亦巨安榮竟徂遷毋怪秦漢君甘心惑神仙  
穰侯拉關中頗畏諸侯客搜車計已遲終困范公策庸夫吝富貴百計私自惜勢移禍敗至智巧竟何益  
至公寬英俊苴補乃無隙請看桑林餓亦脫趙子厄

釁隙不在大巫臣圖夏姬百端終困楚吳子會黃池怨有大于此居高易逢危何言戒困獸無易簧中尸  
林居屏百患草思觀幽遐炎黃已蕪沒末路多玼瑕私智互馳騁短長迭矜夸更相爲禍福勝負時紛拏

超然赤松子高笑在雲霞

周王仗黃鉞自謂將天威孤竹兩君子采薇旁笑之豈徒驚世俗趨死乃如歸周衰楚蒙吏快辯多文詞高言毀二子至與盜跖齊夷齊固齊聖子道豈無知輕身立世教爭奪尙如斯

江湖有潛鱗頗厭沮澤陋竭來游滄溟矯首觀宇宙是時三神山忽隕巨鼈首奔波走仙聖龍蜃紛格鬪重淵沸日月萬類錯昏晝掉尾歸去來蓮巢以爲友

衆聖演世教金仙獨圓成徒緣異形範乃復遭譏評幽居覽物化且復究吾形捐書守寂寞萬化歸無生治疾弭靈藥爽然疾有瘳因茲涉方書仙聖或可求豈疾乃可治而生不可留吾將飛五金息駕于蓬邱懷王棄屈子憔悴楚江湄終然葬魚腹終古耀文詞千年洛陽客作賦不無譏謂當棄之去覽德乃下之君臣本大倫當以恩義持如皆輕合散是與塗人夷靈均豈願沉深意實在茲傳懷終泣死何亦拳拳爲微陰兆九地萬木方滋榮微霜初可履回首陽泉冰秦王按劍日豐沛赤精生光輝能幾時日中月已升達人知其然居世忘驕矜彼哉夸毗子志氣易滿盈

處世三不遇放歌歸去來林臥觀太初悠悠付一杯扶搖震雲海三山安在哉金丹或可學他日出塵埃蒼鷹初化鳩未忍望擊搏照水或見形乃見悔其昨麗戎有奇女遭虜常涕洟改服登音宮更恨來石遲變化驅念慮丈夫或有之貧賤矜懷寶富貴乃無奇

縷絲未緣魚有絲生網心弦木以爲弧鳥獸不安林大鈞本無事物類亦愔愔誰令一機駭萬變起相尋

焚木豈入火棄沙非外金如何巧詐子尙欲峻而深。

晚春獨酌有感

春晏巖谷秀喬木環我居引此西澗泉澗澗漱我除危橋跨方池脩竹萬有餘人閒午陰靜鳥下驚游魚清風掃我堂吏案無文書手携金仙經諷誦自卷舒身閑去道近地僻與世疎何須緩巧頰搖曳王門裾誰謂我無友蕭然山谷閒脩竹乃佳客清風如妙言擷彼林間筍致酒方池邊惟時春服成花葉猶斑斑月出我已醉扶歸不知眠洒然中夜醒起聽西澗泉世累乍去念放歌心浩然功名付長嘯持用樂目前

耀官粟有感

持錢耀官粟日夕擁公門官價雖不高官倉常若貧兼并閉困廩一粒不肯分伺待官粟空騰價邀吾民坐視既不可禁之益紛紜擾擾田畝中果腹才幾人我欲究其源宏闊未易陳哀哉天地閒生民常辛苦

將離柯山十月二十七日

去此定有期逝將泛扁舟千里須聚糧尙復少遲留雖有隸囚籍聊喜脫遐陬問我行何之岱宗古東州念我所居堂蓬茅委荒丘西窗兩芭蕉誰見春萌抽園梅粲已發明掩慶重游今晨一長歎離思浩難收

視盜之南山

窮冬策羸馬祇役走南山原野勢忽盡並溪屢回泓列石如牛羊流泉鳴佩環兩峽忽壁立仰失團圓天淺潤凍欲絕層冰冽我泉躋攀越前嶺危石萬丈懸衣薄近翠壁雲低上層顚谷深日無輝地絕風更寒

百里不逢人。我徒互悲歎。但見女兒峯。萬尋戈劍攢。淋漓鎖冰雪。冷射狐裘穿。日暮投主人。茅茨起孤烟。  
燃薪不計束。未解手足拳。主人前致辭。問官來苦難。我答豈得已。王事不可閑。饋我脫粟飯。殷勤爲加餐。  
山家無酒肉。麤糲味亦甘。月出萬嶺光。夜歸霜滿鞍。迴視所歷途。猿鳥應愁顏。暗想酸兩股。夜眠驚夢魂。  
人生亦可貴。何事戀微官。

冬日自福昌之灑池。

羣岡洛陽西。勢若海浪翻。連嶺起我左。層阜當我前。采如獸騰突。繚若蛇蜿蜒。外高陟縹渺。郤下逼重淵。  
老崖忽中斷。俯視毛骨寒。百丈未見底。立土如巖巒。登高望四垠。目斷無平川。崩騰萬馬羣。出沒相後先。  
雖有貔虎軍。顧步安得前。我觀絕塞處。塊土萬雉堅。崎澗自古險。秦人有重關。信哉天作固。局鍵誰敢干。  
時平戰伐息。地闊村落閑。堆阜何茫茫。耕桑莽相連。平生喜壯觀。弔古重悲歎。山川只自爾。興廢何多端。

宿峻極下院

天寒蒼山高。野寺在山麓。長林繫我馬。古屋留客宿。空巖陰風豪。達旦號古木。夢爲神仙遊。境界脫塵俗。  
平明出戶望。曉日在巖腹。冰霜刮昏霾。萬丈攢翠玉。山行日已久。常苦見未足。猶同賢者處。愈久愈可欲。  
傳聞峻極嶺。千里如在目。愧爾巖上僧。窮年玩幽獨。

下崿嶺

陰風吹我衣。左右入石壁。石色寒更青。蕭蕭響枯櫻。深行方慘淡。路盡兩崖闢。羣山岱然來。千里平若席。

茲惟東周壞氣象雄萬國山河拱別都自古帝皇宅輶輶天設險坐制萬夫力周公卜遷鼎彼肯事無益天寒僮僕愁歲晚霜霰逼緬思垂堂戒攬轡三歎息

初離淮陰聞汎水已下呈七兄

朝離淮陰市春水滿川平依依道邊人送我亦有情千里積雪消布穀催春耕人家遠不見柳色烟中明輕舟鳴桹子野靜遙相應連網收濺刺嘉魚飽南烹平生唔誤歡促膝聯弟兄相逢古難得白髮老易生檣鳥飛更北汎柳綠相迎從今淮山夢卻在鳳凰城

次韻七兄龜山道中

連山赴靈龜石腳疊如積巍峨黃金刹負此鼇背力孤舟繫東風淮雨暗春色朝來一悵望別此巖下石危檣鼓帆腹輕櫓跨浪脊林分岸忽盡鳥去天未極遠游快新曠勝事旋陳迹悵此故里違塵駕何時息

龜山水陸院

院靜步柏影庭虛聞塔鈴連龕香慘淡古榜金青熒山背負華殿淮身朝廣庭旆花龍護法梁棟神扶傾緬懷開山人天眼照廢興一菴檀施集百堵神鬼驚支祁萬古穴石老深潭清坐令金仙力鎮此水府靈我來望春野高閣近青冥白髮老比丘俯僂因逢迎豈無世外人燕坐守無名重堂百僧會合有菩薩行平生一鉢意長歲百慮更狂逃不知返勝地念浮生

曲河驛初見嵩少

我行日益深所遇日益好森然過絕壁慘淡石色老層峰乍崩奔峻峽忽開導清溪瀉兩間淺瀨浮水鳥  
縗紆石路窄構架野橋小娟娟翠篠寒時見木合抱危亭偶平曠是日見嵩少峩峩重雲外傲睨插蒼昊  
坐令羣山勢凌轢困籍蹈平生忽俗事丘壑情所好無謀苟自給薄官廢幽討豈無幽棲士顧我林下笑  
會當採芝去富貴曷足道

秋懷十首

西風吹前林壯士中夜興感此歲月晚白髮來無情少年讀詩書意與屈賈爭口談霸王略銳氣虹霓橫  
天衢白日開致主皎丹誠豈懷富貴念但愧稷契朋栖遲客淮海憂患相纏嬰憔悴消壯氣飢寒費經營  
心期與外物易失常難并蕭條爲斗粟貧賤洛陽城我生亦有命榮辱復何驚但驚歲律邇慷慨懷平生  
呼兒致濁酒長嘯視青冥醉爲梁父吟吟終誰爲聽

又

飄風激浮雲飛雨來若注絲衣逼新涼感此歲云暮高堂有華簟坐覺顏色故人情隨炎涼興廢一何屢  
鮮□中庭菊華葉日敷布可憐搖落中爾獨傲霜露官閑隨□念歲晚無歡趣惟與青山期晴明躡芒履

又

夜靜四聽絕蟋蟀鳴我堂知時爾雖早噴噴竟何傷西風肅萬木百物皆摧藏爾豈不自得悲鳴憩中腸  
寒衣已在梔紈扇委空牀幽詩嗟婦子入處謹風霜而我獨何成遠遊悲異鄉出處兩無策感時空慨慷

又

歲暮無所爲。官門聊飲酒。家貧乏肴果。擷蔬不盈手。要歸一醉爾。甯復計薄厚。頹然几案閒。樗散忘宇宙。古來痛飲人。可是耽醇酎。由來困寂寞。聊此娛昏晝。紛紛眼前物。泯泯胸中垢。當其暫忘去。快若免介胄。蕭蕭風入簷。皎皎月當牖。歌罷興已闌。感歎還搔首。

又

蟲鳴一何悲。竟夕不能已。缺月能幾何。光輝還暫爾。青燈照牀帷。解帶偃宵寐。勞勞隨朝日。既夕聊此憩。是非競賢否。榮辱爭賤貴。紛然無時停。膏火互煎沸。區區竟何有。俯仰終一世。癡兒自驕玩。達者已高逝。無營謝巧械。昨舌笑愚嗜。猶須多貯酒。遲暮聊卒歲。

又

西風掃黃葉。零落委我前。閉門無來客。空牀過午眠。牀頭亦何有。狼籍古人編。琳瑯巧言語。照輝後世傳。餘榮更何恃。朽骨但茫然。悲哉事無益。辛苦勞生前。嗟我方病此。詩書費雕鐫。知愚不自己。旣痼何由痊。霜梧夜槭槭。寒菊朝娟娟。胡爲不飲酒。戚戚愁吾年。

又

悠悠春與秋。泯泯朝復夜。濟時無遠圖。謀食阻高謝。茫茫兩不可。默默私自咤。疎絃無悅音。失路有迷駕。孟軻竟迂闊。樊子欲耕稼。古人不吾待。子子欲誰舍。詩書頗完緝。官事幸休暇。聊從心所樂。此外曷足藉。

又

原野日遼闊。南山疎亭亭。夏雲歛氛翳。秋木呈疎明。幽居苦不樂。展步乘朝晴。嗟我無羽翼。何由躡嶧嶻。神仙雖誕漫。可以忘俗情。乘桴古亦有。况復凌滄溟。浮生既有限。散誕煩冠纓。黃精若可採。高揖吾其行。

秋風從西來。百草隨委棄。如何中庭花。粲粲濯朝靄。雖懷遲暮感。獨秀亦云異。炎涼各一時。豈必桃李貴。遲功有暮祉。銳進或先退。由來一氣耳。瑣屑何足計。

又

吏散門寂寂。蟲鳴夜沉沉。素壁上明月。涼風搖樹陰。悲歌忽不愜。感歎涕盈衿。寫此牢落懷。默坐彈鳴琴。俗耳不好古。古人已非今。悲哉曠四海。子子無知音。

上元家飲值文安君誕辰

新正值家節。時雨霽良宵。林坰敞梵刹。香烟霾白毫。士女傾都出。夾路輪蹄驕。誰能衡茅下。寂寞守無聊。載御芳蘭饌。無辭玉色醪。況值私庭慶。祝壽比蟠桃。

初冬偶成

清商忽已謝。環堵繙清冬。今晨起何早。肅氣淒房櫳。繁霜凜欲結。霽霧迷長空。理畦曉蔬盡。收果高林空。六年淮陽客。歲歲風景同。吁嗟吾老矣。撫事思無窮。

寄集節二首

陳侯氣飄飄。誰敢易挹酌。俊如搏風鷹。清如唳霜鶴。高懷洛俗事。見者初駭愕。須臾發其有。珠玉隨洒落。浩然謝畦畛。誰不愛而樂。論交嗟我晚。玉手未暖握。別來星一周。庭竹再飄籜。洛陽誰知子。恐未免寂寞。嶧嶢胸中氣。誰與發其鑰。知心古所少。獻厚報或薄。興懷每念此。中夜情抱惡。雖然千金璧。豈得常在璞。山城一尊酒。子去誰酬酢。高歌遣我思。長嘯觀寥廓。

北風號空庭。山雪鳴急霰。是時我與子。傾蓋初相見。相逢兩恨晚。語罷喜復歎。明燈照紅爐。杯酌方爛漫。劉公摩霜鬢。氣若初捷戰。喜我兩人交。深杯手持勸。縱橫恣談笑。一醉便侵旦。想子病酒容。蓬頭不能飯。那知會日少。告別不容戀。出門送子歸。慘若失侶雁。終朝或不語。妻子怪相問。別來三得書。日月去如箭。粟何在何處。山川浩千萬。吾將理南棹。遂我江湖願。兩如隨風雲。那復計聚散。遲君秣驪駒。別我過窮縣。

以上宛邱集

# 柯山集拾遺卷二

## 五言古詩

### 食杞

江皋春氣足。佳杞蕃新苗。老柄飽霜露。餘滋發柯條。青青被修□。若綠空壕。僮歸必盈筐。一杯勸爾勞。神農不吾期。夸譽何忉忉。堅筋及奔馬。瑩目察秋毫。餘功補陽幹。清利勝堇椒。老臞天隨翁。空斧無脂膏。飯成資爾薦。長對顏家瓢。

### 在告家居

朝日入寒屋。春風已復來。老子朝睡足。悠然有好懷。冬溫抱微疾。亦不禁酒盃。悠悠三酌後。徑使牢愁開。惱我以貧賤。我心如死灰。誘我以富貴。我視如塵埃。以此行世間。何往願不諧。呼奴具鱠脯。蔬果粗安排。餅中幸未燥。不醉何歸哉。

### 臘月十八日蚤苦寒與家姪飲

寒夜不可旦。老鶴鳴苦遲。晨興出戶視。風折山樹枝。暑愛堂東梅。冽塞亦弄姿。夜來月中影。窺我讀書帷。中庭石井欄。晨汲氣如炊。今日復何事。環佩聯冰澌。漸馨有芳醇。庖舍具鮮肥。地爐熾新炭。三酌對山妻。

余謫居齊安寓郡東佛舍而制不得逾歲今冬遂移居因遣秬秸料理新居作詩示之

孟冬寒氣至北風羣木衰微霖墮簷瓦老客臥先知二年蕭寺客巾履忽復移誰令簡書畏易此鶴鳩枝冥冥造化中毫釐陰有司念此雖細事亦非人所爲東窗頗明爽洒掃吾遨嬉濁酒爲余辦勿使歎空巵

自乾明移居柯山何氏第令秬秸先葺所居

吾居最易足容膝便有餘平生一畝宮游宦乖所圖謫官求便文僦舍柯山隅灑掃勤汝力真成野人居棲鴻媚夜渚待旦志在塗栖遲聊復爾本不計憂娛惟此東窗下可以陳圖書三酌便陶然何者爲吾廬十月十二日夜務宿寄內

夜寒欺老人展轉睡不足長年怕爲客况此空齋宿唱嘵度雲雁瑟瑟受霜竹凍霰冷如植未覺重衾燠天明起盥櫛淡日初照屋寄聲家具酒買魚烹雁鷺

遷居羅漢潘邠老昆仲比以火驚相見殊闊作詩調之

畢方逐未去里巷時狂走念君簞瓢外顏室空無有誤憂黎元謾烜赫驚戶牖我雖厭遷次寒突黔已久平生昧奇字安得君載酒

東園

浮雲蔽亭午白日成蕭森餘涼入坐隅蕭洒散煩襟孟夏愛吾屋秀木成佳陰衆果頗已成永日鳴山禽杖履時亦到逍遙忘滯淫舉頭天雨霽落日低遙岑

荒城繁草木落日下牛羊巍亭俯蔬圃秋物半青黃敢愛雄雞冠殷鮮如激昂黃葵貴且麗薄夜掩其房  
低篁掩蟋蟀枯葦巢螳螂落落中畦圃垂實半老蒼深行亂飛蝶時亦掇芳香況復攜婦子笑言何樂康  
歸溪踏新月到家燈燭光田園興偶動疎懶意何長

步下四望亭至東坡柳逕訪邠老不遇

北下四望嶺兩山中曠平策紆蟠逕術迤靡分溝塍林間樵汲路壠外牛羊鳴落景急晚春淺泥聞耦耕  
餘紅猶落落高綠或亭亭柳間見衡門欹屋尙崢嶸主人掩關去春蕪空復青論文挈兒曹得句懷友生  
安得輞川翁畫此十幅屏

上巳日洛岸獨遊寄陳永甯

風雩感賢游嘉節偶乘興人稀好鳥語麥秀春野靜澄波漾清洛游子渡明鏡南山夜來雨雲日淡相應  
解鞍憩高柳覽物動新詠優游徒侶喜豐熟蔬果盛官閑省文檄俗古少喧競乘闊輒獨游茲焉樂吾性

渡洛游三鄉書所見

重雲蔽南山遠見山雨白我行山之北便與雲雨隔西風來如奔零亂雲物拆驅除信果決灑掃絕餘濁  
收雷如歸師蹄轍度南磧羣峰湧地出掀蕩無留碧暮投三鄉寺落日在東壁鐘鳴高閣晚野迥見歸翼  
還家晚川靜秋月未生魄聊資覽物態應用慰行役

游白馬寺

秋林轉層崖，步踏落葉響。  
森森夾路竹，蠹蟲羽林仗。  
精廬隱深塢，門啓臺殿敞。  
纍纍霜果懸，落落寒木壯。  
房深燈火煖，縱飲頗酣暢。  
山寒夜已深，嶺白月微上。  
天明寺南去，幽路隘而防。  
林分逕忽斷，淺見闊逾丈。  
崩奔被澗石，大小非一狀。  
丸丸列囷廩，落落排甕盎。  
鳴泉走石罅，聯絡弄清漲。  
喧頽競飛漱，泓瀉或平漾。  
羣行命朋儕，因息植吾杖。  
泓松見奇鼠，石蟹侑朝餉。  
深行耳目靜，擠險誰復讓。  
寒聯老木陰，暖值丹崖曠。  
秋暉墮平野，暮鳥啼青嶂。  
徜徉未知返，欲去意先愴。  
欲先愴膏粱與薇蕨，美惡隨所尚。  
當其兩自得，厭滿絕餘望。  
乃知山林樂，豈爲隱者妄。  
況吾不事事，枯槁理則當。  
遑遑施仁義，此固聖賢量。  
我自沮溺徒，疎頑安可強。

獨遊崇化寺題觀音院

默默苦不展，駕言陟崇崗。  
人遠塵坌息，高門開寶坊。  
華簷敞虛殿，喬木護修廊。  
閒庭引幽步，偃息得茲堂。  
惟時炎火衰，清秋朝暮涼。  
窗虛竹色靜，風遠松聲長。  
遙山露雲表，遠水連天光。  
獨遊不自得，遐眺有餘傷。  
留滯感華歲，登臨思故鄉。  
言歸日已夕，月出林蒼蒼。

宿鳳翅山懸泉寺

秋山晚景涼，幽路轉石壁。  
稍知步武峻，漸與鷄犬隔。  
層崖恃我西，懸瀑垂百尺。  
崩騰擣重泓，晝夜碎珪璧。  
天寒行已深，嶺轉客轉息。  
最愛下山泉，潺潺馬蹄側。  
重門敞幽寺，臺殿忽開闢。  
野僧三四人，披衣出迎客。  
陰陰脩竹靜，下有神龍宅。  
泓澄一畝泉，黯黯萬古色。  
翛然改瞻視，異物如不隔。  
蕭蕭毛髮竦，佇立動神魄。

雲低秋天陰木落山日夕房寒燈火青夜久人語寂通宵淡無夢起望曉天白山川接周韓清洛去不極我無軒冕意野性自夙昔塵埃阻幽好奔走愧謀食偷閑到丘壑使欲老泉石君有在籠鶴豈願潛六翮將歸且復止既去緩吾策寄語山中人行當蠟雙屐

病瘡登疊嶂樓

沉疴幸蕭散登覽慰無聊江南春尚早餘雪冒山椒野梅臨風謝溪澌映日消晴林鳥聲樂幽墅水文搖新人意樂初霽物華饒共理慙良牧無政載風謠

登雙溪閣

清溪浮天光北驚而西折羣山合沓來斷作青玉玦中圍萬家邑簫鼓樂芳節仲春卉木麗紅綠晚明滅重樓壓城角高眺俯木末川雲斷還續谷鳥鳴復歇興闌未能返留酌待芳月

淮陽

淮陽古帝墟鄙夫少所遊最愛城西路槐榆拱高秋城下古濠水□澄泓不流嗟哉始封君千古留一邱西風躍新兔魚鼈亦易求穀穗如垂珠松林風颶颶異鄉仍謫官一步九回頭何時守一廛白首自徂縗

新開北原

山深草木多春夏廢翦剔北原有高溪經歲不躡屐陰根走重險飛蔓密如織交柯不容鳥老榜頑若石由茲廢登眺幽致莽蕭瑟杖藜每獨往駐立爲歎息窮秋九月衰霜過萬葉赤北風始驅除蒙翳遭搏擊

乘時集吾徒。斤斧必謹飭。攀緣窮翦伐。上下恣搜剔。霜芒落勁節。巨劙剖堅植。蛟龍脫鱗鬚。犀兕遺骨革。薪蒸不足道。椽棟固委積。紛紜一日勞。既暮岩藪闢。寒篁露幽翠。佳木呈秀色。高臺忽平敞。快步失荆棘。巉巉女兒峰。次第見晴碧。遙村暮烟合。鳥鳥寒寂歷。縱橫目前景。指顧歸咫尺。茲焉遂忘返。漸可攜尊席。人間有能事。功效在勤力。惡深當痛治。穢盡善斯得。經年滯窮谷。庶以娛朝夕。題詩寄初終。撫事心有激。

春遊昌谷訪李長吉故居

連山忽中開。研若敞雙戶。清泉瀉中間。行子並溪去。蒼崖左右壁。田壠亦碁布。渠流漲春漪。鳴澗轉芳嶼。鶴豚見茅屋。負檐隱微路。竹塢藹青葱。花岩被紅素。仲春雨新歛。晴日破氛霧。南山當其門。列嶂儼環護。深行不知厭。捨馬時獨步。欣然耳目愜。遂我麋鹿趣。朝隨浮雲來。歸轡月中度。惆悵錦囊生。遺居無復處。

寄題何戢秀才琬琰堂

幽人築淇澳。不與世相聞。獨攜千卷書。過於骨肉親。辛苦作室堂。插架如魚鱗。時時體不住。一遇千載人。山川兵火後。墟廟金石存。消磨餘紙墨。幻滅去無痕。功名但如此。知子道可尊。不遺世一毫。以全與其身。包醜傅黛膏。百態售笑顰。誰能雙蛾眉。閉戶自貴珍。鄙人有夙尚。願與幽侶敦。他年抱健犢。聽嘯入蘇門。

讀管子

夷吾相桓公。豈復偶際會。觀其平生心。身已有所委。天方困生民。弒伐實在已。求居寓所欲。糾與白等耳。堂堂東海邦。內政謹疆理。南荆北達燕。玉幣走千里。仲尼免左衽。自以身受賜。孟軻聖之偶。非薄良有謂。

彼狂後世儒詆毀恣輕議嗟哉不量分詎解聖賢意區區彼商鞅操術良非是爲法昧所從以身受其弊

讀杜集

風雅不復興後來誰可數陵遲數百歲天地實生甫假之虹與霓照耀蟠肺腑奪其富貴樂激使事言語遂令困飢寒食糲衣掛縷幽憂勇憤怒字字倒牛虎嘲詞破萬家摧拉誰得禦又如滔天水決洩得神禹他人守一巧爲豆不能簞君獨備飛奔捷蹄兼駿羽飄萍竟終老到死尙爲旅高才遭委棄誰不怨且怒君乎獨此忘所惜唐遺緒悲嗟痛禍亂欲取葬倫叙天資自忠義豈媚後人覩艱難得一職言事竟齟齬此心耿可見誰肯浪自苦鄙哉淺丈夫夸已訥其主文章不知道安得擅今古光焰萬丈長猶能伏韓愈

石曼卿三佛名大字

石公神僊狂脫落隱詩酒餘情到翰墨落筆聞宇宙嶧嶧龜山殿風雨梁棟舊煌煌三佛榜鐵柱貫金紐開張宮室正渾實山嶽厚井水駭龍跼蛇封觀驥驥欲知兮毫初一酌盡數斗墨池氈作筆神運不知手從容解牛際蕭散善刀後古來精絕藝所貴神氣守嗚呼渦水側爽氣一培塿微工付浩刼念此終銷朽乾坤一大幻妄計金石壽惟有龕中人吾生茲稽首

臥病讀韋蘇州詩呈无咎

閑官無吏課未午省中歸端居屬微疾僊臥度秋輝書帙紛几席減穀亦清羸庭花敗風雨晚蝶弄餘姿懷公天津語夢起江湖思高秋挾橈櫓一與水神嬉上去觸檣闌奮飛有縛維令人慙髀肉消盡定何爲

喜寶積智珍道人惠書偈

南山老禪翁白淨如水月。我初獲親近解此癡腦結。十年歸故里。父老半存滅。逢師百如舊。才若旦夜別。故知靜能久。豈有火中鐵。致身煩熱外。與世作冰雪。窮秋長安巷。客子送書札。龍蛙不同趣。掬海救其渴。平生笑謀食。中路願頗奪。猶如伏轅鹿。野性終跳躋。觸塗惟欲睡。過眼時一曠。塵尼本無瑕。塵垢終冀豁。

讀太白感興擬作二首

瑤姬上帝子。天日與晶光。萬古巫山中。玉顏照秋江。世界一培塿。誰知楚襄王。宋生底蟲蛆。妄以己意量。我無世上心。乃遊不死鄉。與爾等愛惡。朽枯終一藏。陳王本無賴。少與美人期。蛾眉作穢血。蠱鬼尙何知。乃復結綢繆。停車心傷悲。幻滅猶欲取。哀哉一癡兒。千年化異物。雙作鴛鴦飛。終然隨大化。飄蕩今何之。

讀唐書二首

隋文方混一。自謂垂無疆。安知房之喬。拱立待其亡。哲人妙觀世。俗慮固不長。我知蒲柳衰。甯待遭風霜。奇姿終英發。起驂龍鳳翔。巍巍貞觀續。千載配虞唐。二張挾嬖寵。聲勢各滔天。蛇鼠依城社。自謂終千年。天道惡滿盈。五龍忽騰騫。斷頭誰救汝。假豚尸道邊。擊狗不擊首。反噬理必然。智勇忽迷方。脫匣授龍泉。區區薛季祿。先事僅能言。留禍啟臨淄。敗謀豈非天。

睡起效韋蘇州

睡足起無事。開局步中園。中園復何有。花草萬已繁。飛紅被行路。山鳥時一喧。時雨副耕稼。農事起郊原。

仰欣天時好。俯驚歲月奔。自憐栖遲者。守寂沒亡言。

飲酒擬柳子厚。

澤國多水氣。日西春尚寒。窮居無樂事。且復開清樽。一酌召和氣。三觴失愁顏。百憂如崩雲。天地爲我寬。采采中田杞。愈食仍甘淡。登盤自有味。何必盛炮燔。

何斯舉惠酒

孟夏飲燒酒。窮居莫致之。扣門聞好語。出應自披衣。雙榼儼在門。使者前致詞。斂衽受嘉貺。敬此旨且時。且喜尊不燥。安得計滄漓。但恐昧奇字。令人愧鴟夷。

文周翰邀至王十元園飲

朝衫衝曉塵。歸帽障夕陽。日月馬上過。詩書篋中藏。心疑長安人。一一如我忙。城西有佳友。延我步閑坊。入門見主人。謝客無簪裳。蒲團烏皮几。密室留妙香。門前佳木陰。堂後羅衆芳。飯客炊雕胡。旨酒來上方。盈盈雙鬟女。身小未及牀。執板歌一聲。賓主無留觴。漱井消午醉。掃花坐晚涼。主翁塵外人。三十辭明光。閉門自灌園。種花見老蒼。有才不試事。歸臥野僧房。知君非徒然。顧我不能量。始知同一國。喧靜自相忘。衆綠結夏帷。老紅駐春粧。何惜君馬蹄。坐令風雨狂。

寺晚

春寒掩古寺。遲日轉修廊。古殿流塵暗。空庭碧草芳。中有撚筇者。非醉亦非狂。謫官滄江上。已換一炎涼。

春來不出門。蔬飯守禪堂。不知門外花。風雨知在亡。興來時展卷。睡足自焚香。清吟嘗旨酒。疎懈味何長。

余方止酒。

辛未立春

彩勝耀朝日。歡言立新春。朝陽披宿靄。頗覺天地溫。蔬盤簇細甲。相勸御芳辛。誰云冰霜底。微綠還陳根。我居雙老槐。對聳蒼龍鱗。歲窮益慘淡。何以慰老人。

三更

三更月暈合。定知明日雨。開門已蕭颯。寒氣侵庭宇。東風變淒凜。閉戶思室處。賴茲尊有酒。細酌供燕語。斗杓行指卯。雖寒能幾許。惟應園林好。新霽千花吐。

正月二日探春

青春來幾時。臘雪消未已。蒼茫陳根中。新綠已映趾。高風變冰霜。和氣從此始。青芒綴蒲柳。紅粒粧桃李。融泥發新陽。暖日動生意。經年不窺園。偶此攜婦子。提筐擗野甲。若苦寒蔬美。新年酌尊酒。佳節聊燕喜。優游自有趣。朝市苦多事。閑暇不易求。甯須歎留滯。

端居

舍東日初上。堂南雪已消。鳥聲弄新霽。春風動柳條。學道心未降。端居生寂寥。佳人不可挹。芳物爲無聊。夕屏還自掩。彎月已翹翹。黯黯長安夜。愁思悵迢迢。

又

餘寒羞老木。慘淡氣未平。王國富車馬。士女競新正。風埃息九陌。紈綺艷重城。燈稀夕烟重。斗轉夜寒生。倚檻復何待。依依空復情。

四月之初風雨淒冷如窮秋兀坐不夜堂

東君已成歸。風雨爲之殿。夜來柯山溜。深射交百箭。可憐東園花。收拾無一片。開門不能出。逕滑那得踐。還歸酌卯酒。佐酌有藜莧。重思理貂裘。未月愁紈扇。

又

風雨四月初。正作窮秋寒。朱明方更候。陰沴時相干。陰陽天自便。寒暑無必然。玄冥與祝融。政事誰得專。江鄉累歲飢。一飽望今年。不知誰不仁。探喉奪其漁。柯山窮老人。方暑愁衣單。似聞林筍立。蟲蠹戈戟攢。但知飲美酒。折取共朝盤。

夏夜

一雨洗空曠。蕭然天地秋。陰陽有至信。殘暑逝不留。中夜事忽變。西風延蓐收。雲雷西北來。瀰漫布九州。萬生息惔焚。我疾亦已瘳。起哦不待曉。暗步禪堂幽。落月傾屋西。候蟲鳴不休。坐令百感集。歲晏此淹留。

十月七日晨起

山鶴鳴曉晴。寒日在蓬華。老人欣然起。構火溫小室。室中空無有。掃榻對像佛。還觀舊文字。塵土暗編帙。

一杯徑就醉。四體寒若失。隔窗卽山麓。寒木鳴瑟瑟。江民旱累歲。流冗東就食。蚨蝗食陳蔡。千里無草色。客來談世事。亹亹語千百。客去深閉門。頹然無我責。

衰荷

衰荷有餘姿。秋水清更急。木落天宇寬。庭虛山氣入。寒魚漸受釣。野果晴可拾。幽居無餘營。但與山水習。濟時無良謀。戎陳畏戈鋋。端坐閱歲時。多慚微祿及。

入伏後三日

老火熾而焰。端能流弱金。清秋有微警。西風生薄陰。日中無停暉。俛仰忽已沉。齊紈不足玩。流景逝駸駸。盛衰甯獨行。中具密相尋。蓬茅有佳處。亦足慰人心。

畏暑不出

赫赫三萬里。共煮一鼎湯。蓬茅數椽屋。何處有清涼。惟有攝心坐。憇此真道場。清虛無一物。焚灼不能傷。自我知此趣。兩脚不下堂。人皆笑我拙。我亦笑人狂。

夏至

長養功已極。大運忽云遷。人間漫未知。微陰生九原。殺生忽更柄。寒暑將成年。崔巍千雲樹。安得保芳鮮。幾微物所忽。漸進理必然。蹉哉觀化子。默坐付忘言。

庵東窗雨霽月出梅花影見窗上

山頭冷月出射我幽窗明屋東有新梅寒影交疎櫺暗香不可挹彷彿認繁英耿耿終無言依依如有情  
悅疑姑射真仙馭下我庭姮娥曉西去滿樹晨霜清

疎梅二首

疎梅落寒晴高柳暗春夕低星上蒼寒遠鐘韻澄寂頗私朝市間更得閨闥僻且復罷經過深泥濘馬臆  
又

我貧受寒欺帖帖爲不出積雨遽市聲幽居近芳物時禽過我柳清喙動鳴瑟客去門復局低參映林沒

黃菊

黃菊出荒歲揚揚顏色好芙蓉不能霜敗裂不自保君子與小人於此見其操最憐所種蔬根葉依畦老朝晡充盤飧滋味不枯槁鶴鳴鄰里靜老子起常早呼童速沽酒無使尊中燥

次韻錢大尹公庭種菊

人才因齊量能尺不能咫誰知錢京兆獄訟間書史平明吏擁堂過午掃階所風威變姦傲應若度淮枳  
清秋動高興庭菊粲可喜栽培豈無情收拾自乘委客來擷芳秀歲晏聊爾耳新涼一尊酒九日意在彼  
平生經濟手張趙一泥滓何必滄落英離憂對蘭芷

堂下幽草

烈日三萬里所至壞金石嗟哉庭中草獨不改佳色日中雖暫萎晨露發鮮碧深根通九地變化有微測

應知一氣移不得常炎赫。

詠雙槐

花開水可憐采色不堅久譬如玩冰雪隨執隨去手可悅則生愛愛滅惱隨後美好稱不祥此語端易究中庭兩蒼槐老柄獨晚秀殘春餘十日萬葉舒欲覆森森翠羽蓋植立分左右波濤起風夜幄幕護炎晝其榮無可悅衰變亦何咎欲攀無足玩欲擗無足嗅泊兮初無情淡也故可守病來捐衆嗜味道有真觀寄言兩蒼翁請與汝此壽。

大榆

高榆百餘年其大數十圍修柯遏雲日老柄干虹霓嗟爾擁腫材大匠已見遺何人失翦伐養此頑鈍姿夏葉穴蟲蟻繁柯蔽涼颸寒颶烈風怒號白陵冬曦鸞鳳不女巢所藏鴟與鵟吾甯愛彈射念爾不 $\square$ 宜蟠據起牆屋斧斤諒難施去惡不慎微既成安可追

竹

自吾居山中默默無與歡朝晡誰相對賴此青琅玕堂東一畝池遠分西澗泉蕭蕭一萬竿結根護池壘婉婉翠鳳凰舞風照清瀾微飄自天來新佩鳴已喧王子骨已朽後來豈有賢諒非鬢與盲敢慢回與騫灌溉養春苗芟除去其繁終日淡相對俗車無至門

石竹

真竹乃不華爾獨艷暮春何妨兒女眼謂爾勝霜筠世無王子猷豈有知竹人粲粲好自持時來稱此君

乞竹贈邠老

與君共一山修竹居其間義當給兩家潘子不得慳帶甲十萬夫不戰終日閑辱使支敝廬令我愧滿顏代竹爲洗竹義取洗益繁乞我萬之一令君風月寬袁多以益寡天道自古然詩成復自笑詩禮資儒姦

理東堂隙地自種菜

幽居無一事隙地自畦蔬秋雨忽甲坼青青千萬餘江鄉盛菘芥烹咀亦甘腴豈惟供晨餐庶用備冬菹桓桓左將軍英氣橫八區邂逅無事時弛弓曾把鉏矧我放逐者終年守敝廬諒非勤四體寓意以爲娛晨餐入匕筯美不儻羹哉神農豈欺予魏姥有前誌魏夫人有服薤方致神仙云

春蔬

苣甲如刀圭蕷蒿未生葉紫芥綠如指蕪菁苗過茁先生家四壁食案稍羅列芬芳茗薑芥每徹有餘啜公侯烹五鼎一飽廚流血神官計功罪沉魄受陰殺先生飽捫腹萬事致瑣屑載覽損益篇終古守斯說此方爲菜條爲菜疑非此衆字

食蓑葵苗

江鄉有奇蔬。本草記蓑葵。驅風利頑渾。解疫補體節。春深土膏肥。紫筍迸玉裂。烹之荖薑橘。盡取無可輟。應同玉井蓮。已過貓頭苗。異時中州去。買子攜根撥。免令食蔬人。區區美薇蕨。

七日晚同潘郎乘月到欒家觀鶴。問石生羚羊角偶有之。今早惠角一對良真是也。吾藥遂成欣然作詩。

昨宵風月好。攜手得吾人。南街訪老鶴。夜扣主人門。入門未相見。清唳已可聞。見我展雙翅。俛啄意甚馴。訪藥偶有之初。尙疑未真。今晨墮我前。獲此萬里珍。羚羊角出文龍州。披圖驗良是。入藥定有神。望茲以試方。輔此老病身。嗟我天所窮。一事百苦辛。茲遊乃輒遂。造物良已仁。因歌遂成詩。往調柯山君。

食蟹

世言蟹毒甚。過食風乃乘。風淫爲末疾。能敗股與肱。我讀本草書。美惡未有憑。筋絕不可理。蟹續牢如綏。骨萎用蟹補。可使無駕崩。凡風待火出。熱甚風乃騰。中炎若遇蟹。其快如霜冷。俗傳未必妄。但恐殊愛憎。本草起東漢。要之出賢能。雖失諒不遠。堯跖終殊稱。書生自信書。俚說徒營營。

谷鳥

谷鳥有和聲。杖藜北園路。悠悠雪委泥。靄靄春浮樹。櫻包欲破紅。梅葩粉墜素。幸茲沉疴間。復此賞心遇。晴陽山氣昏。積雨溪光露。四郊農事起。興懷田野趣。

晝睡

雨去天已秋。暑歸日猶永。聊爲清晝眠。度此亭午景。蟲鳴籬落晚。地僻鄰里靜。起坐晚聞鷄。虛堂無俗聽。我非汲汲者。失脚陷機穿。天道不吾欺。茲焉遣朝暝。

十三夜風雨作暑氣頓盡明日與晁郎小飲

雨洗風掃除。老火不復燎。蓐收行正令。一夕清八表。衰骸困燒煮。魂魄始可招。東窗美一睡。燈火清自照。銀河南南注。促織近堂奧。歲晚我何爲。三觴醉清曉。

寄中山鶴

矯矯雲外物。本非世所馴。懷安敗爾性。乃與人相親。戛然而長鳴。已愧鴻在雲。馬羈當受鞭。泉汲甯辭渾。豈無山中友。初不離鷄羣。雖無月支料。亦飽松間身。陸魯望詩有鶴料。嗟我少學古。有道羞賤貧。至出不自受。蹉跎曳朝紳。一爲折腰趨。永愧植杖耘。時時猶高談。自喜未縕磷。寄語中山鶴。吾與汝知津。

四月一日同潘何小酌

今晨一杯酒。相屬送歸春。明年東風至。何處復迎新。懸知柯山下。猶作未知人。來事如者夢。未至難預論。且使飲此酒。陶然付大鈞。

春日雜書八首

長安春雪消天地。一清潤。牆東風霜朽。新葉如奮迅。老懷輕歲月。榮謝置不問。平生兒女心。乘閒亦鬪進。

微芳觸鼻界。春意滿方寸。却嫌一餅鉢。事與花不應。出門逢一士。韋布汙塵土。延之升賓階。再拜色低沮。間來何所欲。涕下說貧窶。其求升斗爾。我亦不能具。我窮與君等。祿不飽兒女。一事聊自賢。無求差勝汝。年長心益衰。讀書常苦忘。當其欲談說。散墜挽不上。詩書非真學。盡記未足尙。但憎心辜眼。不爲謹守藏。書多墨入腹。無乃與飯妨。何如粲然白。廣作酒肉盃。春風無形迹。貧舍亦時至。欲將桃李蹊。易此冰雪地。朝陽屋角暖。岸幘散衿袂。跡來飭妻子。裘纏且飲費。那知事大謬。暮雪卷風至。單衣不得出。宛轉眠被袂。亦知事不久。頃刻度匪易。四鄰同一歡。初不辨此計。天公擅萬物。與奪得自恣。如何倒寒燠。乃以命爲戲。浮名一蹭蹬。萬事付莽鹵。惟餘田園心。尚欲學老圃。空庭春雪盡。平地灌膏乳。買花門前翁。栽插粲可數。種之未浹日。晝夜風卷土。真須學抱甕。敢信春必雨。隔牆見藜藿。氣欲陵棟宇。彼獨誰使之。時來遽如許。謂春正無情。乃發桃與李。若真有知者。風惡折蘭芷。是非一無與。任物自生死。德之固已愚。怨者亦豈理。有圃畏不蕃。有田憂不美。吾環堵蕭然。于何生慍喜。昨日爲雨備。今晨天乃風。障風謹自保。通夕雪迷空。備一常失計。盡備力不供。因之置不爲。拱手受禍凶。當爲不可壞。任彼萬變攻築室。如金石何。勞計春冬。

此道簡且安。古來家國同。

吾聞古夸父。逐日沉虞淵。以日爲可逐。智固未足言。徒能出八極。擣突干雲天。當其憊且斃。更使兒女憐。至弱敗至剛。水波乃飄山。誰能守此道。却敵以空巒。

春郊草木明。秀色如可攬。雨餘塵埃少。信馬不知遠。黃亂高柳輕。綠鋪新麥短。南山逼人來。漲洛清漫漫。  
人家寒食近。桃李暖將綻。年豐婦子樂。日出牛羊散。攜酒莫辭貧。東風花欲爛。

又

塞池冬不流。落葉塞泉磧。東風日夕來。春色到山舍。杖藜遶東溪。流水清可架。疊石引之來。潺潺到深夜。  
平欄朝可鑑。倒影見亭榭。清風起修篁。翠鳥亦來下。天和人意舒。春暖景物姪。歌此濯纓詩。塵埃欲高謝。

又

致酒傍修竹。竹風吹我衣。臨觴曷不樂。感此盛與衰。昔我池邊柳。北風無完枝。春芽忽可擷。弱弱不自持。  
榮枯兩相召。念此能幾時。要終必復始。惜我芳華萎。自古無如何。悲歌欲何爲。聊進杯中物。日醉以爲期。

南山如佳人。秀色慰我思。微風從東來。清洛搖春漪。驅馬出門去。悠悠踏長堤。暖日麗花草。微雲渡南溪。  
高邱者誰子。斷裂崗前碑。當年豈不偉。泯泯今誰知。老翁驅牛耕。墳草半已犁。功名但若此。達士觀如遺。  
飲酒復飲酒。勸君無復辭。人生百無益。惟有飲庶幾。

又

長嘯視天壤。手撫白玉琴。一撫再三歎。誰哉知我音。翩翩媚俗子。一仰復一沉。靈鳳翔九霄。不顧蒿下禽。  
擇食無果腹。貪藏有良金。豈無得與失。兩各行其心。窮通亦有命。榮辱迭相尋。躬耕儻未輟。聊爲梁父吟。

又

今晨起何早。盥漱坐南軒。啄木響高柳。春渠鳴亂泉。悠然此時心。默默誰與言。焚香閱素書。濯手開靈篇。神爽道自合。體和真亦全。蕭蕭毛髮輕。浩氣驅昏煩。呼童策藜杖。躡露開中園。擗彼杞與菊。歸烹助盤飧。既飽誰與樂。登高望南山。還歸酌美酒。興罷復陶然。

又

夜醉朝未醒。披衣步南堂。折彼曉樹花。嗅此凝露香。好鳥鳴我林。聲如韻風篁。娟娟屋外杏。顧我如窺墻。物色豈不好。人情獨何傷。思我二三子。各限天一方。無鬢不可游。無羽不可翔。耿耿千里心。箕昂互相望。結交古所重。義合不能忘。離別可奈何。還歸舉子觴。

又

浮雲起南山。冉冉朝復雨。蒼鳩鳴竹間。兩兩自相語。老農城中歸。沽酒飲其婦。共言今年麥。新綠已映土。去年一尺雪。新澤至已屢。豐年坐可待。春服行欲補。

又

嗟余尉窮縣。端坐百無慮。幸茲歲豐穰。庶息塵埃步。乘間策羸馬。莽莽出門去。田原亦可悅。農事藹方布。還家有詩書。客至具鷄黍。勿復嘆遠游。人生孰非寓。

又

漫漫東風來吹此庭前櫻纍纍綴葩萼華采日鮮明朝陽助輝爍好鳥亦和鳴起行不自得節物傷我情皇天分四時寒暑無暫停悠然一氣耳不與人事爭方春感分敷秋復惜其零一年能幾何方寸不暫平念此自知妄放歌遂遺形達人傲天壤兒女徒咿嚦

又

仲春漸燠沐據散常遠步獨穿林下蹊斜轉竹間嶼鳴舉競漱石迸筍或妨路吹衣信和風濯足解雙履深行意益愜默坐憩亦屢野花迎客來啼鳥驚我去羣鳴投樹鶯獨下過溪鷺晴霞送斜日歷歷星已布娟娟新月彎稍稍山已暮用此遣朝昏誰謂非尺素

又

高臺面南山獨立望空闊東風悠然來吹我鬢中髮獨遊動遠思覽物念所悅伊人在千里山水不可越玉音坐契闊容華有消歇悲哉音莫致雜珮空自結羣飛雲間鴻北羽儼成列愛日崇令德嘉好當無絕

又

沉陰涉春仲積潦斷行蹟浮雲起南山商羊未休息壅涸無宿滯芬芳有新摘燈明休閒齊鳥靜山靄夕濁醪足斟酌野杞柔可食瑤簪脫雛笱玉縷剝肥鯽冥懷默有契玩理方自得庶幾達人風持用慰寂默

感春

淹留生白髮默默又驚春花房與柳萼三見東風新竟日雨不止翛翛寒着人擁裘坐閉閣但與山爐貌

昔我東南交。藹藹賢簪紳。朝晡不相捨。談笑夜達晨。清言聞嘲謔。侑以肴與尊。風花春院靜。霰雪夜爐溫。南士多文章。最愛蔡與秦。蔡彥規。秦太虛。吳僧參寥者。參寥法名道潛。瀟洒出埃塵。詩多山水情。野鶴唳秋旻。江子貧而廉。鄉黨稱其仁。江瞻道。徐子節最苦。徐仲舉。五十慕其親。頗有豪俠風。時時見於文。相逢必痛飲。大醜若鯨吞。家無一金資。有口不言貧。楚望自南來。周楚望。贈我佳句頻。送我歌百言。爛如張錦茵。蔡子不可見。窮泉悶幽魂。遺書誰收拾。撫舊心空存。僧寥安在哉。江漢一孤鱗。徐子益寥落。寂無人薦論。周子有書來。乃在吳江濱。其餘數子者。影響無由聞。寥寥青天高。落落參與辰。東西不相及。難合易離分。自我官窮山。耳目如聾昏。相逢半俗物。彊笑接歡欣。景物豈不嘉。招攜阻嘉賓。端如守籠鶴。終日掩吾門。春風動花光。桃李曰纊紛。長歌寫我思。書寄東飛雲。以上宛邱集。

# 柯山集拾遺卷三

## 七言古詩

### 送晁將之咸平簿

逢君執經博士堂。見君賜第出明光。俛眉作吏百態惡。豫章參天要雪霜。連牆秋雨老藜莧。十日不見已束裝。試尋崔丞謝客處。壁間有詩細作行。來向任咸平丞。

### 二月十五日

春風揚塵春日白。衡門向城人寂寂。淮陽三月桃李時。街頭時有賣花兒。老人臥穩起常晚。欲強出游心獨懶。一尊美酒酬芳菲。老大不及年少時。

### 通海夜雨寄淮上故人

黃沙渾渾水滿川。奔流爭岸虎眼漩。南來舟子慣風水。萬斛長船如等閑。濛濛春雨楊柳溼。漠漠人家雞犬寒。道途歸人寄消息。客行安穩近長安。

### 泊永州城西寺下有感

春水沄沄何處盡。連檣裊裊似當時。昨日橋邊繫船客。南來北去知爲誰。他鄉異縣各風物。游子居人長

別離歎息東城修竹寺塵埃漫滅十年題。

伏暑日唯食粥一甌盡屏人事頗逍遙效皮陸體

烈日炎風鼓大爐籐牀瓦枕閉門居屏書居士持齋日掛壁禪僧問法圖鄰汲滿攜泉似乳新春旋糴米如珠飽浪餉粥消長夏况值飢年不敢餘

壬午正月望夜赴臨汝宿襄城古驛縣有古寺家人輩夜往焚香襄城古邑也可以眺二室地爽  
壇退之所謂潁水嵩山豁眼明者癸未元夕謫居齊安攜家游定惠妙圓承天下大雲東禪蓋  
出雨夜有感示秬秸

江城收燈寒寂歷里巷閉門不復出蓬茅數屋逐臣廬門前樵牛臥斜日老人擁褐爐前睡眼冷不眠思  
往事去年襄城古驛亭野縣風埃尋古寺周楚川原氣象存峴山紫邇秀連雲地留寶鼎周京貴山拱泥  
金神岳尊齊安江上漁樵市誰料今年身到此大江繞郭風濤翻城中岡壠無平地青紅剪綵挂影燈漁  
夫樵婦來相仍短簫急鼓集兒女叢祠夜半鷓鴣驚浮生夢境何足計呼童且閉柴門睡百年江上誰得  
知竿木隨身聊一戲

題安州張全翁大夫溪圖

清溪縈洄流碧玉散入綠岡萬竿竹照春四合錦繡林千雲直上風霜木主人吾宗行珪璧解組歸來鬢  
猶綠祇知林下酒盈樽不憂門外車推轂靈心內守消冰炭洗眼旁觀看榮辱造物乘除真有理却將康

健還無欲。嗟予放浪已半世。斥逐不去綠微祿。六年一夢百憂患。踏雨褰裳過林麓。殺雞爲黍固留我。我自奔忙不皇宿。乃知風月爲君好。頗覺禽魚憎我俗。楚魚稻賤如土。老去容身一茅屋。他年杖履請卜鄰。與君靜話烹梁粥。

次韻蘇內相好頭赤

世無將軍飛食肉。宛馬不來鞭費竹。赤鷺當御亦偶然。冀北此曹量計谷。慙愧蒲梢汗流赤。翻鬢胡風嘶漢日。麒麟不合地上行。誰道風雲未經歷。

題東坡卜算子後

蘇先生責居黃州。嘗作卜算子云。缺月掛疏桐。漏斷人初靜。誰見幽人獨往來。縹緲孤鴻影。驚起却回頭。有恨無人省。揀盡寒枝不肯棲。寂寞沙洲冷。因題此詩。

空江月明魚龍眠。月中孤鴻影翩翩。有人清吟立江邊。葛巾藜杖眼窺天。夜涼月墮幽蟲急。鴻影翹沙衣露溼。仙人采詩作步虛。玉皇飲之碧琳腴。

不雨

齊安一郡雨不足。稻畦土堅不入穀城。中赤日風吹沙。老鴉銜火燒口屋。百尺長繩抽井底。井中泥滓多于水。潭邊龍祠懸紙錢。誰令霹靂驚龍眠。

厭雨

夜來雨聲倒百川。老農起坐不敢眠。曰疑漲潦捲屋去。又恐涌水興牀前。旦視山川一泥濘。流沛千頃新秧田。蝦蟇相呼動百千。不念兩股充庖煎。

又

霖霪望晴病望汙。里巷呻吟夜達旦。風清日出未敢喜。天公高居龍魚悍。夜聲翻盆畫綆糜。百川失性皆上馳。乾坤震蕩動植悲。誰居無事爲此嬉。

又

朝雨沒田夜崩屋。下民何罪罹此毒。天公行雨須口龍。那知人欲食龍肉。玄雲暮天不可決。日烏戢翼愁暘谷。區區昏墊未足憂。當念波濤翻地軸。

又

柯山老人家四壁深。居閉門不下席。日補丹田氣三咽。自言茲味勝玉食。無田無屋一空囊。不管門前水三尺。有錢沽酒便不憂。會見天清還白日。

夢游陳州柳河覺而作。

虎豹九關未敢望。里門舊游如可尋。夢到城西古壕水。倚天高柳萬黃金。叢祠之南我舊圃。蔬甲若若春泥深。睡覺啼禽自相問。經年他鄉何滯淫。

新正

春風浩浩春陽盡。老木生芽綠如豆。古巢老鳥聲鴉鴉。南陂雨乾麥將秀。人家寒食無一月。青箬蒸魚競時節。白衫紫領來自由。縣官呼我要青錢。

苦寒二首

二月八日寒未已。山城雨過淨如洗。城門樵漁不復來。市中屐齒響長街。老翁一杯百不知。酒酣放歌視羣兒。句芒當權不用事。玄冥功成徒爾爲。

又

山城新炭賤于土。老翁守爐朝復暮。時傾牆下一杯酒。不怕簷前三尺雨。共言麥好歲當熟。里巷往來聞好語。老大湯餅百不憂。折脚鎗中足烹煮。

贈馬十二全玉沿檄過楚頃刻而別

我離海邊方季夏。子時別我西亭下。是時積雨河水深。卻看孤舟放清夜。爾來忽忽冬已闌。歲晚荒涼學官舍。那知復與子攜手。猶能頃刻聽清話。來時綠樹今黃葉。須信丹顏暗中化。別離易得當重惜。歲月難留足悲吒。人生坎輶多憂娛。萬事紛紛少休暇。况子飄泊不可當。幾度相逢即衰謝。功名有命何足求。富貴無常求亦乍。隋珠彈雀雖有獲。纖塵未補千金價。我于世事甘不學。久師壁觀依僧社。辱君指我曹溪源。行雖未至甯辭駕。君如有志反邱壑。我卽求田買桑柘。卜鄰丈室聽談禪。更問老農求稼稼。

別梅

宦遊到處卽爲家。况我遷謫來天涯。三年假館主人屋。忽忽屢見新梅花。那知今冬當去此。十月已見凌霜葩。繞之百匝未易別。對我脈脈如含嗟。懸知客去門復遠。亭沼人散啼昏鴟。朝風吹香散寂歷。夜月照影低橫斜。嗟我明年復何處。東州旱野連桑麻。相思時有夢魂到。極目南望空烟霞。

初夏

南風吹筍成修竹。園林一番新陰綠。足愁多病少懽娛。感時念遠傷幽獨。遙山林外知何處。倦客樓頭空極目。悲笳三疊閉江城。娟娟新月啼烏宿。

和應之蝎虎

蝎虎捕蠅君歎息。爾胡縱蝎蠅遭食。畏難悔易真可尤。能捕飛蠅猶有益。君不見世上虛名相借與。號以千鈞實無縷。豈惟無益害從旃。搏繩之虎猶爲賢。

寒夜

暗空無星雲抹漆。邑犬吠野人履霜。歲云暮矣風落木。夜如何其斗插江。屋頭眠雞正寂寂。野縣嚴鼓先逢逢。摩挲老面起構火。春色牀頭酒滿缸。

雪中狂言五首

江鄉密雪常在春。異哉今臘已再白。風嚴無聲掠樹過。茅簷飛霰鳴策策。老農飽食莫畏寒。天意在汝田中麥。我雖無田助爾喜。來歲不憂湯餅窄。

又

今春齊安大疾疫。閭里老弱死籍籍。篾繩蘆席肩兩夫。繞郭纍纍瘞千百。玄冥一日行。正公癟氣入地應。  
千尺。異鄉身健。百不憂。有錢但知沽酒喫。

又

我家中州食嗜麵。長羅如船磴。如電爛銀白。壁照中廚膳。夫調和隨百變。江鄉種麥幾數粒。強進腥魚蒸  
糲飯。雪深麥好定豐登。明年一飽償吾願。

又

請說吾鄉人種麥。漫山亘野頃千百。北風寒嚴大澤乾。一臘何啻見三白。春泥水消土脈動。壠畝漸縱牛  
羊續。街頭作餅大如槃。一歲衣食事已畢。

又

故園陳墟太昊祠。臘雪消後融春泥。韭芽苜甲初出土。春槃釤鬪如夢絲。里閭經過厭此物。糖餽寒具方  
交馳。江南魚稻豈不美。長年謫居長土思。

園花盛開鉗病不能觀。作詩諭之。

空山岑寂何所有。晚菊芙蓉相對幽。伴我悠悠過閑日。憐渠灼灼媚窮秋。清香但欲持供佛。醉舞何妨插  
滿頭。此生萍梗難前料。知復明年相見不。

聞紅鵠有感

東風吹曉麥青青。柯山樹頭紅鵠鳴。牕間夢斷容歎息。憶我去年臨汝城。平池朱閣花如雪。峴山少室雨奇絕。豈知崎嶇黃土崗。茅屋蘆○風雨折。殷勤寄語望嵩樓。此身強健會重游。陳跡再尋難料得。正如三到舊黃州。

聞蘇先生除校書郎喜而爲詩并招王子中

續溪仙翁若秋鶴。有喙不向腥羶啄。幾年戢翼大江南。下看紛紛飛燕雀。親攜杖拂呵禪祖。自伐松根出靈藥。世人真自爲公忙。公甯有意人間樂。嗣皇繼明登俊彥。詔遣讎書天祿閣。江山氣象滿收貯。傾倒歸來開萬橐。咸韶無聲嗟已久。野鼓羌絃自宮角。當令鸞鳳見文章。却遣邱陵仰山巒。王郎蕭蕭好文筆。一世清名推衛樂。嶺頭梅發始辭家。坐見長安秋葉落。滯留窮縣許過我。季心不負千金諾。何爲歲晚尚遲留。庭下寒篁還解籜。我老栖栖亦何事。一官未足充藜藿。讀書把筆工無益。執板折腰心已怍。頑踈一味難鞭撻。妙道多生欲穿鑿。惟君所事與我同。他日相從鄭君學。葛稚川授道鄭君子。由先生于道深矣。

偶書三首

秋陰漫漫幾千里。赤壁磯前天接水。連檣接柂不復行。老魚擘波時出戲。黃橙紫栗收如積。青錢買酒不堪惜。北人歲久厭南漁。山邊有路何時還。

蓬草紫鬢舊宮誰復游。鼎峙雄心久蕭瑟。  
周郎戰處滄江回。魚龍蕩潏山石摧。荊州艤幢莫舉櫂。走君不勞一炬灰。  
當年雄豪誰復在。喬木荒煙忽千載。蘄州截竹作笛材。一寫山川萬古哀。

感春

我愛沙邊雙白鷗。飛鳴相樂還相求。往來飲啄性如一。異類不至心無憂。  
我來窮山無與友。雖有接納非吾儕。人生從類乃爲樂。強言笑語懨何由。

對酒奉懷無咎

城門失火池魚窮。樹頭風聲酒榼空。雖貧家婦有旨蓄。一一可口不待豐。  
往來曳杖兩足健。醉後哦詩雙頰紅。最憶南都晁別駕。高歌大笑聲如鐘。

我兄改秩令新昌。相望雖遠同江外。君家兄弟數如我。曹南好在龐眉弟。  
官微無利沾骨肉。兩處強健差自慰。近來老子還破禪。一女咿唔猶未睚。

醉郡圃二首

東風流園開百花。繁紅爛白如晴霞。主人殷勤勸客飲。我爲滿醻醉以華。  
游人酒客興未足。舉首白日西南斜。人生有酒不肯飲。百年醒坐何爲耶。  
驅童晨摘承露花。薦以玉盤濡井華。誰云離本卽憔悴。持玩入手意有加。  
爲之致酒就几案。影落酒底空。

浮葩平生看花常不足。肯使容易親塵沙。

秋園雜感

只今枯條冒衰蔓。異時密葉如翠葆。執斤之子久睥睨。籜未待薪已除竈。寄言青雲富貴人。金朱能得幾時好。是非榮辱百不知。却輸頑鈍柯山老。以上宛邱集

# 柯山集拾遺卷四

## 五言律詩

孝感縣

蕭索江干縣。林端見客檣。山川錯吳楚。人物混荆揚。風略寒蘆陣。雲迷夕鳥行。故鄉同見月。誰記白頭吟。

蒙恩除奉常有感

平生兼周禮。投老奉龍旂。斥逐偶不死。歸來敢恨遲。門闌走賓客。行李飭妻兒。又踏長安道。多慙鬢有絲。

春寒二首

星霜殘臘過。霰雪一冬頻。雲重常昏晝。寒多更入春。晚風梢翠暮。輕雨斂微塵。滿酌山樽酒。驅愁爾最親。

又

漠漠陰還合。迢迢日自長。雲容將雨露。山意自風霜。欄甲青辭土。園枝笑倚牆。薄寒能幾許。春雨滿池塘。

春晴

溪流清欲漲。山雪白仍鋪。耕隴晴羅雉。春渠煖口蔬。禽魚隨處樂。草木向陽舒。酒病年來甚。高眠懶著書。

傷春

山城夜來雨。臥病惜殘春。暗暗鳥啼樹。飄飄花去人。地偏佳客斷。官冷酒錢貧。乘興還騎馬。田家樂更真。

近清明二首

斜日去不駐。好風來有情。江城過風雨。花木近清明。水樹閒光影。山禽時引聲。吾年行老矣。淹泊塞何成。

又

冉冉春向老。昏昏日復斜。鮮懽常止酒。不睡更烹茶。幡起烟中刹。鶯鳴林外家。陳王鬪鶯道。風柳不勝斜。

青春

青春忽妍好。半嶺麗朝陽。谷鳥喜相見。園花明曉粧。閑居耽道味。吟眺惜風光。扣戶有佳客。悠然三舉觴。寒食後數日。方持齋誦經。而東園遊人甚盛。因而賦此。

芳物忽過半。寒食已闌珊。園靜鳴鳥下。花稀新葉繁。焚香翻貝葉。謝客掩柴關。止酒方清坐。畦蔬助晚飧。寒食日贈同飲者

暮春書四首

春城風雨後。花落滿人家。宿潤留芳草。晴輝上曉霞。園林正寒食。樽酒對年華。一笑相逢地。功名莫嘆嗟。冉冉春將老。悠悠晝掩關。鳩鳴高柳暗。雨細廣庭閑。塵榻談無客。風簾望有山。啞泥新燕子。一一及時還。

又

冉冉春將老。遲遲日正長。露花低曉架。風絮集閑堂。水煖荷爭出。杯寒杏已長。芳菲值窮谷。嗟負少年狂。

又

林花飛已久。芳草雨餘長。人靜槐庭午。簾斜竹院涼。沾泥新筍白。封蠟煮醪香。莫厭殘春醉。流鶯勸舉觴。

春暮有感二首

午枕消暗永。春裘御曉清。砌紅多近采。園綠有深鳴。窗破斜光入。爐消斷碧橫。白頭爲吏苦。高臥笑浮生。

又

江城春雨暗。客舍夜燈明。構火添香炷。擁衾聞竹聲。微明旁舍火。斷續遠樓更。何處群離鳥。孤飛深夜鳴。

感春二首

不覺悠悠過。東風換故年。青春消霰雪。白日滿山川。草綠飄梅地。江平去鴈天。故園桃李動。東望每依然。

又

爲問閑茅客。窮愁何所憚。焚香延晝睡。酤酒過春寒。歲月顚毛換。古今行路難。浮生付造物。留滯復何歎。

晚春

積雨桃李暗。西園已晚春。平池花照影。深樹鳥窺人。飛近燕知主。青分柳過鄰。浮生似羣動。聊復共欣欣。

送春

莽莽平原綠悠悠。晚樹紅巢成鶯哺子。柳老絮飛空碧艸。長亭路青旛野店風傷心對千里。無酒奈愁空。

遲日

遲日花光亂。東風酒浪深。天邊爲客恨。老去惜春心。起舞狂猶在。悲歌病不禁。高樓見千里。不醉莫登臨。

晚晴

臺塵朝雨細。透竹夕陽明。鳥雀知春去。牛羊散晚晴。官閑端欲老。謀拙漫無成。堂下清溪水。三逢蘋芷生。

秋晚

鳥栖林已靜。門掩吏□歸。黃葉雨中盡。鳴蟲霜後微。塵凝經暑扇。貂敝早寒衣。賴有清尊酒。山爐徹夜圍。

黃人謂寒食上塚爲澆山其祭饌多用弱菜事已則鳴鉦而歸

攜酒澆山去。鳴鉦徹祭歸。青蔬蒸果弱。白酒市無旗。市多私酒不立旗。望日暮人皆醉。夜深歌似啼。上冢歸則歌聲甚悲。故人書問我。何用久居夷。

東池

東池久不到。搖落過秋中。萬竹蕭蕭雨。孤荷嫋嫋風。遺秋詩酒在。久客歲時窮。唯有思鄉夢。長隨洛水東。

和應之盛夏

驅馬畏炎暑。杜門常鮮憊。吳綃朝扇薄。越布夜衾單。飲沼山禽渴。沾泥雨果殘。二年薇與蕨。實厭野人飧。和應之永日

多病倦煩暑。幸茲山水幽。惜芳悲鶴鵠。占雨聽鳴鳩。池影澄當戶。山陰暮轉樓。黃昏螢點點。秋信與堪愁。  
偶摘梅數枝。致案上。盤中芬然。遂開因爲作一詩。

偶別霜城陋。來蒙玉案登。清香侵硯水。寒影伴書燈。見我粲如笑。贈人慵未能。將何伴高潔。清曉誦黃庭。  
初冬小園寓目

獨樹翹寒色。閑雲澹落暉。新霜黃菊重。久雨翠梧稀。暝雀鳴還啄。高鳥定更飛。敝貂猶故在。卒歲免無衣。  
冬日作二首

又  
南雨不成雪。北風樓觀寒。眉顰魯酒薄。腸斷楚梅酸。雲夢寒全薄。湖湘春欲還。舉頭瞻去鴈。羨爾有輕翰。

澤國久還雨。頻妨裘褐溫。羈懷常悄悄。醉眼任昏昏。雲赴荆王夢。天迷楚客魂。飄萍惟泥酒。吾事肯輕論。  
冬日卽事

郡閑多暇日。况乃值清冬。風葉已成掃。霜蕪猶復重。佛香留夜火。蔬飯候晨鐘。誰信二千石。心如一衲翁。  
冬日書事二首

草草漫翁居。心安知有餘。風高收野潦。霜晚足園蔬。宿火溫茶口。明燈轉素書。御冬無旨蓄。漬藥酒盈壺。

孤城已慘淡。晚色復朦朧。日動烏栖葉。雲開鴈去風。草繁田尚綠。霜薄葉微紅。已是悲搖落。那堪歲更窮。

臘日晚步

喜覺陽和近。山園策杖行。  
草應知地暖。柳欲向人輕。  
殘雪通春信。鳴禽報曉晴。  
田閭未成計。搔首向春耕。

臘日四首

今日何妍暖。青春亦不遲。  
竹尋穿地筍。梅有犯寒枝。  
雲物晴無事。禽魚暖自私。  
芳菲行滿眼。準擬報愁知。

又

臘雲寒不動。殘歲轉蕭條。  
雪意千山靜。天形一鴈高。  
冰留簷舊滴。紅到杏新梢。  
寂寥羣兒笑。因文更解嘲。

又

日暖村村路。人家迭送迎。  
婚姻須歲暮。酒醴幸年登。  
簫鼓兒童集。衣裳婦女矜。  
敢辭鷄黍費。農事及春興。

冬夜二首

慘慘諸山暮。寥寥老樹空。  
尙飛霜鴈急。不動雪雲重。  
掛冷寒燈壁。悲傳夜柝風。  
隔窗無恨竹。蕭颯到晨鐘。

又

歲晚轉無趣。蓆門誰駐車。  
澗泉分當井。山葉掃供廚。  
謀拙從人笑。身閑讀我書。  
幸知霜霰晚。時得灌園蔬。

臘月書事

荆棘連昌路。珠璣久化塵。青山飛白鳥。野水渡行人。寂寂繁華盡。悠悠草木春。人間有興廢。何事獨傷神。

十一月七日五首

寒更催欲盡。曙色轉雞吭。鳴鴈背曉斗。清笳吟宿霜。空山歲華晚。故園歸夢長。晨起臨清鏡。悲嗟髮已蒼。

又

寒暑添線衲。朝晡折足鐺。無言病居士。面壁老胡僧。佛祖豈欺我。乾坤終有憑窮年。一。事高臥醉騰騰。

又

山與晴天晚。江連夕照紅。高鴻知夜渚。喬木要霜風。買酒缸須滿。溫爐火屢供。窮通定何物。隨意樂衰翁。

三杯無奈醉。一褐有餘溫。眼下幸無事。世間何足論。山僧元飽飯。詞客謾招魂。杖策知何詣。門前老圃村。

冬至後三日三首

水霧今晨重。山川不復分。自然無日色。那更挾霜分。烏鳥依寒寂。漁樵散暝昏。一杯聊愈疾。令我憶違君。

寒暑添線衲。朝晡折足鐺。何勞問榮辱。便是了平生。理自陰陽運。吾甯口舌爭。深居玩吾寶。不遣世人輕。

水國過冬至。風光春已生。梅如相見喜。鴈有欲歸聲。老去書全懶。閑中酒愈傾。窮通付吾道。不復問君平。

又

又

梅柳有情態江城過歲除山村見霜橘江市出寒魚謫久衣冠懶身閑故舊疎傍籬挑翠甲憶我故園蔬歲暮閑韻四首

又

歲暮柯山客端居不出門風煙限僻壤閭井若荒村江鳥占寒暑樓筭報曉昏風枝吹斷蔓霜葉擁陳根慷慨看口劍煩愁泥酒樽孤烟吹日晏寸口語宵分未肯傷鱗泣還須視舌存可能天理錯難與俗人論魑魅徒爲爾梟鸞竟異羣江湖休浩渺心拱北辰尊

歲暮柯山客蕭條酒一樽貧閑緣事少老冷賴爐溫草木千山麓蓬茅數畝村相逢半農圃無事理雞豚落井吹鳴碓橫參對掩門人歸邑犬吠江黑夜虹翻櫛感顛毛減書愁病眼昏按方成小釀徵古構新文默喻乾坤意靜看魑魅奔何須歎虎兕吾道古來尊

又

歲暮柯山客晨興理小堂重雲隔短日老樹口清霜煖足加爐炭翻經炷佛香蠲疴藥探篋破悶酒盈觴江落朝宗急年登播殖忙江魚切玉白楚稻撲雲黃獵獲頻拱炙鄰蔬屢許嘗吾謀殊未失曝背負朝陽

靜枕聞鳴雁。開門對遠林。烏賓朝日上。雞送曙河沉。今古竟一致。乾坤固有心。悲歌激壯氣。未覺鬢霜侵。

歲暮

歲暮無聊客。端居如坐禪。薄霜猶衣袂。多雨急收田。落日烏鳶集。晴林橘柚懸。已無軒冕念。岑寂度殘年。

小雨

小雨廉纖晚。幽花寂歷秋。嘉時空冉冉。白日付悠悠。亂思工繁恨。危腸只貯愁。唯應時扣寂。一念萬緣休。

和應之細雨

朝烟和細雨。病眼暗難分。有潤物皆澤。無聲人不聞。綠連平野稼。翠雜亂山氛。晚霽復何有。飄飄神女雲。

和小雨

入夜雨聲急。坐愁衾枕單。春歸千里恨。夢斷五更寒。遺興芳樽滿。驚心節物殘。山城近野水。半夜有歸翰。

晚霽

山川收滯雨。鳥鵠有和聲。半嶺日猶照。一天雲盡行。人皆理牆壁。吾亦掃柴荆。鵝鳴何多喜。渠流漾淺清。

秋雨書事

荏苒歲云暮。空山朝夕陰。可堪連日雨。併作晚秋霖。蕭颯三川合。淒涼八月深。衰荷啼臥水。怨葉泣辭林。徑滑蓬蒿長。庭荒苔蘚侵。遠聲連促織。疎滴和清琨。燈暗殘更夢。閨寒向曉衾。沾衣貧路客。啼苦失巢禽。天接岡巒近。雲連草樹深。川容千仗肅。溪力萬艘沉。紅溼梨垂頰。黃沾菊破金。苑荒懷古恨。樓遠望鄉心。

碧漲池中浪。青藏雲外岑。客城陰燐走。敗舍溼蠅尋。騎省驚衰颯。荊州嘆滯淫。恨饒經暑扇。冷入補衣針。  
懶學書高閣。驅愁酒細斟。離憂殊未闋。悵望一長吟。

雨中五首

又

手種階前樹。今朝亦有花。春陰寒食節。陋巷逐臣家。欲酌消愁酒。先澆破睡茶。游人歸踏雨。里巷晚喧譁。  
節物卽自好。客心何落然。早寒清野市。夜雨溼江天。破屋疎茅滴。空廚溼葷烟。政須一杯酒。相與度殘年。

又

積雨暗春色。東風還慘懷。梅殘無復笑。鶯怨欲成啼。暇日無民訟。芳時有酒攜。不辭乘興出。病足畏深泥。

又

春殘厭寒攬。雨多空日長。飯餘時築杖。睡足獨焚香。芍藥正酣寢。海棠渾未粧。賢哉堂下竹。相對只蒼蒼。

又

三日雨不止。陰雲生我堂。曉寒如臘月。凍坐憶朝陽。過鴈低薄屋。高梅飄度牆。呼童傾一榼。獨對孟光嘗。

大雪苦寒五更無睡枕上成兩篇

大雪人跡絕。衡門閉不知。寒城悲角迴。幽谷曉雞遲。歲月去如失。窮通默自知。但知飽寢飯。天道兩無私。

又

雪氣著我屋。雞層畏薄衾。春寒竹窗睡。曉夢故鄉心。多病妨豪飲。無私稱苦吟。小爐熾新炭。卯酒再三斟。

雪晴苦寒

雪齋

水驛微茫外。檣烏蒼莽中。人愁暮村雪。雁急夜淮風。大澤凍相接。羣山深未窮。蕭條歲事晚。舟檝伴南翁。

賦得風示秬秸

寂寂舍中韻。清風時見嘉。無意偶自動。雖鳴終不譁。宮懸奏編磬。朝佩響衝牙。誰知無譜曲。與世好黃華。

福昌書事言懷一百韻上運判唐通直

戰國韓餘壤。王畿漢舊京。福昌故韓地。南圍山峙秀。東泛洛浮清。女几荒遺廟。宜陽認故城。千秋迷佩玦。  
百戰有榛荆。女几有古女几祠。按李賀詩云。女几乃杜蘭香神女上昇地。有遺凡。宜陽有韓城。路失三鄉  
驛。店有三鄉驛。今廢。岡餘世祖營。光武降赤眉于宜陽。原廟今存。山疑熊耳甲。墓記赤眉兵。積甲齊熊耳  
山。山在三鄉西。赤眉冢在世祖祠下。昌水行宮廢。連昌宮三鄉東。昌水陽。穀州遺堞傾。福昌故爲穀州城  
存。斷壕收劍鏃。耕隴得瑤瓊。姬冢邱陵抱。邑西有姬家陵。蓋周墓。韓祠草木平。韓王有墓與祠。傳家亡譜  
牒。懷德薦牢牲。姬陵有姬姓家韓祠。土人祭之。峽勢開雙壁。川形畫一枰。謀臣赤松友。張良韓人。詩客錦  
囊生。李賀昌谷在三鄉界。莽莽繁華盡。悠悠井邑更興亡。誰與弔。今古一傷情。官舍連麋鹿。人家雜駢甡。

秋心悲杜宇。春候聽鶴鶡。賓榻無談笑。塵鞍罷送迎。平池宵檻影。萬竹曉堂聲。放宕書千卷。栖遲歲再正。  
野胥形豐掠。村隸語生孳。脫粟供朝飯。孤豚計日烹。里間輕學校。兒稚駭冠纓。府西學者笑。冠帶最苦衝  
風隧。奔如萬戰輞。木號驚浪涌。谷震疾雷轟。古 □ 河洛多風福。昌尤甚。目斷蘭香膊。南有露膊山。世傳蘭  
香以膊示母。雲藏子晉笙。壽安有憩鶴山。村鼙朝坎坎。樵斧暮丁丁。鬢自年來白。顏因醉後頰。齋庖誅野  
菊。幽佩納秦蘅。憶昔初知學。時豪計主盟。討論披石室。咳唾視金籜。宅與仁爲里。豐期道可耕。蕩除秦漢  
垢。繤摘帝王英。太史遺重補。騷歌韻再賡。文潢無逆檄。談陣有降鉦。戰苦心逾勇。鋒交敵喪勣。決科聊筮  
仕。射策偶沾榮。憔悴官曹冗。艱難禍難嬰。未欲授臨淮簿。歲餘居喪。流年惟涕淚。生事罄瓶罍。乞米常空  
釜。烹葵不厭羹。管縣長劍溢。衣補舊圖橫。波浪流萍遠。風霜客雁征。憑誰能束縕。請地乞爲氓。貧賤知何  
計。飄零復此行。力微蜘蛛織。謀拙蠻纏繫。大府多豪傑。何人問姓名。采葑甘見棄。連彙敢圖亨。已分微言  
默。羞將薄技呈。清秋迴驥首。白日望鵬程。調拙歌難和。工迂簧未成。曳裾身阻闊。搔首歲峥嵘。豈料鹽車  
困。親逢伯樂評。屬文慙賈誼。受璧過虞卿。未一獻鄙文。即屬清舉。夙昔傾賢譽。清時仰慶闔。霜威留陞闈。  
仙露照金莖。偉量謙常過。剛腸枉必爭。川舟歸巨涉。天柱入高擎。鱣墮開佳兆。經傳有舊鑿。簪纓光故物。  
堂構疊高甍。顧步丹霄近。聯綿盛事并。人間望鴻鵠。海浪引鯤鯨。百吏瞻儀矩。連城受使令。晏邊爭羨慕。

膺御有光晶報國求賢急搜才薦牘盈未伏聞執事以荐賢爲急搜羅歸掌握輕重付權衡律變遭寒黍  
春催隱谷嚶陶埏皆作器枯槁亦抽萌量度分尋尺題評盡甲庚念勤寬僕僕卹疾救惄惄合沓皆宗薦  
綿蠻不歎鬻羈鴻安肅肅微草獲菁菁哲匠深垂獎非才惕自驚厚恩山岌峩高致玉錚錚効報期銘骨  
存誠過食苹庶幾鳴缶盍萬一助謨諍自古求知重從來顧已輕木欣辭爨燼珠喜辨魚晴歎慕身當銳  
軒昂目暗瞳自存心鐵石敢廢力蚊蟲荒學重裨緝繁文自補擣朝披枯竹簡夜守短燈檠養木經荒圃  
疏泉久涸泓博兼終氏鼠禮問叔孫櫻陋每輕樊子勤將比老彭中庸期慥慥言行政確確積累功成姪  
輝華秀發瑩辛勤施耨穫逸樂薦粢盛戴德千鈞重撫躬方寸明登臨感身世踊躍望門檻窮谷陰多雨  
清溪晚放晴優游探物象瀟洒付杯觥耿耿馳千里區區布一鳴願迴韶蕡聽聊奏鐵錚錚

送胡唐臣赴蘇州僉判

他日馳戎馬風塵從事衫花開大梁酒木落太湖帆幕府煩精悍吳山入笑談長安米不賤君與問江南  
泛宛溪至敬亭祠送別

南國初寒候扁舟遠客心歸人出斷岸晚翼會疎林漁市臨官道叢祠蔽木陰長年多感慨况此對分襟

送丁秀才侍竹之邕州

五嶺天南極扁舟遠客心歸人出斷岸晚翼會疎林漁市臨官道叢祠蔽木陰長年多感慨况此對分襟

送蔡彥規之任風泉主簿

四十曳青袍。功名晚未遭。賢人固難進。小邑且徒勞。秦俗謳謠口。雍州形勢豪。憑君懷古意。一一寄風騷。

別外甥楊克一二首

東南秋雨足。澤國水連天。日出數聲雁。風高何處船。寒菹初獲韭。野餉屢烹鮮。吾事無淹速。悠悠得醉眠。

送劉南夫赴任京師

却掃楚山根。相遇唯有君。齊年未白髮。不日上青雲。送別悲秋早。傷離賴酒醺。青衫老司馬。落淚獨紛紛。

和見夢

青山將白髮。奔走倦埃塵。與物拙難合。惟君心獨親。相思成夜夢。得句寄游鱗。未得親談笑。書來莫厭頻。

和應之雨中見懷之作

官居苦岑寂。容易過花時。綠暗野初秀。紅乾風更吹。燕游心未展。歸去意猶遲。浩蕩雲山外。新詩寄我思。

用元韻因寄邦直

濠上昔相逢。同時執桂叢。遠遊悲聚散。投老信窮通。靜見賢人節。恬知達士風。淹留君莫嘆。榮辱竟虛空。

書事寄晁應之

野筍空堦短。蒲芽出水齊。柳垂繁鵠重。花裏帶蜂低。桑弱蠶登箔。池晴燕啄泥。官閑無事役。地僻斷招攜。

目極榛蕪地。心傷桃李蹊。萎花辭雨泣。幽鳥別春啼。白髮驚身老。高樓對日西。運逢詩將健。路入醉鄉迷。

燒醑傾新臘。輕羅換舊裾。香紈裁暑扇。密幄徹寒闌。喬木陰垂屋。清渠冷接溪。惜芳幽鶴鳩。催夢怨黃鸝。  
高會思前日。酣歌到曉雞。駕羊君自幼。倚玉我慚羈。誰解藏車轄。歸來信馬蹄。還家門寂寂。過雨草萋萋。  
氣合非容易。官拘坐阻睽。孤吟唯酒對。愁立見鳥栖。學懶因循過。詩成取次題。相思不可望。烟靄暮淒淒。

題所居西齋

幽居不厭小小院。有深庭。一曲秋風地。低簷夕照明。脫條株有態。止水瑩含清。中有支離客。吟腰瘦沈卿。

題楚州聖井并贈主僧

古佛勝妙力。一泓常湛然。禱祈供衆欲。守護賴師賢。清碧晨齋罷。秋登寶供前。自憐多病質。時許挹清泉。

題倪敦復北軒

瀟洒倪夫子。新城面北堂。庭前無獄訟。客至有壺觴。畫靜塵埃絕。春餘花草香。爲君題素壁。容我醉中狂。

書壁

後院人稀到。荒池半是苔。好花隨地有。幽鳥自山來。靡靡香草合。陰陰夏木催。昭亭有佳色。每至不容回。  
和應之石澗

麥氣朝含露。溪光夕照煙。鬪麋蒼角老。雛雉絳毛鮮。葵折紅繪縹。蓮香水麝燃。敢辭幽僻處。直恐負林泉。

李贊皇畫像

管樂久寥闊。興王一士多。平生自龍虎。功業在山河。公子悲黃犬。騷人赴汨羅。當年閬川恨。流落復如何。

散步西園

歲晚傷局促。散懷唯小園。鳴禽下荒寂。孤木倚高寒。閏月長蔬甲。清霜瘦竹竿。荆人重鮮食。怪我厭魚餐。

七月七日晚步園中見落葉如積感而作

東園久不到。落葉曲池平。搖落遠如許。歲時真可驚。衡茅望故里。漁釣寄餘生。放逐逢艱歲。藜羹未敢輕。

秋園

山蹊久不到。落葉滿秋園。幽草自寒綠。晚花翹碧鮮。鷄豚放斜日。鷗鷺下遙天。閭里經過熟。居夷已一年。

種圃

促舍亦爲圃。從人笑我癡。自求佳草木。仍補小藩籬。吾事正如此。人生聊自怡。霜松未及尺。獨我見奇姿。

東園二首

小園晴自掃。曝日坐前軒。野鼠穿山葉。寒鴉啄草根。短籬藩隙地。別逕入孤村。幽趣供岑寂。淹留不復論。

又

水落橋痕在。沙乾岸草枯。霜餘槐老壯。風際竹清疎。啄木高逾響。鵠鵠飛且呼。二年親友絕。唯有對禽魚。

萬松亭有感

小雨濕青松。松間多好風。翠光濃欲滴。對舞千蛟龍。可惜青玉釵。道邊委花蓬。幽人不汝棄。應有綠毛翁。

幽草

幽草堂軒秀，盆池遇雨添。新晴雀哺子，永日燕穿簾。世事休驚目，閑中且養恬。黃公有美酒，時得醉厭厭。

又

衰草已無賴，秋花只強名。雨園蛩響細，寒樹鳥啼清。淹泊知吾道，幽居見物情。唯應有鄰叟，足雨問農耕。

山暝孤猿吟

平野何岑寂，空山晚易陰。微雲數峯暝，幽谷一猿吟。風果飢逾少，霜枝冷不禁。引吭當落日，激響度前林。  
最惻騷人興，偏悽遠客心。空齋懷謝守，空復昔時音。以上宛邱集。

